

T 3150 / 3432.82

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
MAY 7 1938

澤州府志卷之四十八

國朝

女媧廟三章

魏象樞

維天清虛維石頑冥煉補而後孰辨厥形 天可問乎不得
其門如何未補仰之可捫 五色既成渾圓無漏西北不完
伊誰之咎

寄藐山

楊時化

出處能無異何妨臭若蘭九重曾識履一壑肯彈冠世仰其
猷壯八惟在澗寬金陵不乏友須讓比隣權

靈泉寺謁舍利塔是密公埋履處

携友攀藤拄短筇廿年今始躡東峯誰云勝事淪于載猶有
慈陰起萬松性與虛空長不壞法如泡影叩無從暫時隨喜

哈佛大學漢和
圖書館珍藏

澤州府志 卷之四十一
旋歸去愧爾山僧早暮鐘

遊聖樂寺

不耐塵紛劇心貪佛地閑寺藏幽僻處路在有無間東望遙
通澤西來近自樊鄰村烟火遠荒歲米蔬艱人語竹鷄散鐘
聲幾鴿還風微泉活活山靜鳥關關白犬信生客蒼苔疊古
斑流漸梳澗髮氛霧暗峯顏入目松皆好點頭石未頑緇徒
謝俗冗百畝糞前灣

下太行

誰說太行路不平正因危險景相迎天從遠樹望邊斷身在
千峯頂上行野菊飄香秋已老山椒浮紫雨初晴偶然缺處
單懷見丹沁分渠縱以橫

龍泉紀事

余友金銘數遊龍泉取其可蠲煩課靜惜好韻未標羶響
空谷爰率吾黨經始疏淪分合隱見畧盡泉情詩紀其事
時天啓癸亥二之日也

龍泉泉有龍膜鑠會不省意當興雨雲祁祁霑旁境不然媚
幽棲千載儷箕穎何哉恣狼藉終古浸荒梗徒資老圃惰蹄
涉濺馳騁井渫惻吾徒遊歷恒耿耿賴有張季鷹尊鱸歸來
頃笑彼買山迂愛茲欲習靜良朋互經營攘剔以作屏發蒙
爲沼渠次第亂流整賀汝泉遂遭乃當荒翳永三歎意在昔
浸沒聒鼃黽觀妙詎云足曲折亦已炳夾波立松筠中央紛
藻荇文漪晝煩滌清磬宵寐警得閒卽過從流連爲娟靚

石塘洞

白孕昌

石洞垂天末乘風一叩關吾方矜遠俗世豈妒看山谷響舒

清嘯林光帶頰顏白雲飛滿袖携取到人間

下太行

石鳳臺

病子耽于役衝雲出太行故園春色老古道柳絲長風雨隨
車急山川嘆客忙君恩如可報誰肯負滄浪

杪秋麻嘯夜飲

山孤月色寒猿嘯野花殘秋氣清如洗潭光靜可觀詩情依
鳥樹酒力坐雲磐澹漠甘林壑誰歌行路難

登麻樓山

河清不可俟避世始縈縈野老識余意招呼山上行東峯旣
翠嶽西峯亦崢嶸坐卧煙霞擁時聽松栢聲

盤亭

山情迴合處青松掛古藤借問前溪叟白雪深幾層

仙人洞

栢林常挂青霞色蘿洞時飛丹竈烟往日夢遊今日到翠微
掩映水涓涓

雪中發陽城

趙執信

雪暗成堞高遙見東嶺背城邊騎馬路寒水明朝靄飈驚鳥
不飛霧宿山多態路轉陟峰顛曠望一無礙前臨若無地岡
阜紛破碎迴視荒烟分適與城郭對人家儼鱗次雲水互掩
曖鷄犬聒昏朝陰晴作明晦三日此中居風土佳可愛夜閣
火常溫高齋酒頻載長途冉冉去竚立心孔瘳太息謂送人
勝事應難再

棲龍池

張泰交

大塊皆文章山水傳其妙所以古淵人窮年展清眺不險不

能竒登臨貴有要崔嵬橫嶺南千仞色同縹丹碧疊雲屏松
栢繪霞嶠懸巖莽回互危磴盤林杪瑤殿開雲根澗壑縈窈
窕其下有澄潭黝然深且杳云是蛟龍居石上羊腸遶滄溟
縮一盃洩則尾間竅孤探足自怡歸路斜暉耀安得此中居
跼跌抱朕兆

閏十一月游張坦之門嶮山砦

白孕謙

縣南山絕竒巘岼列仙掌嘗恨烟火骨蹉跌在塵鞅雪陀經
世人獨抱箕穎想尋山造其奧結茅千仞上以我爲漁父誘
入桃花港所從盡豪異各具屐一兩鷄鳴發桑林虎啼亂莽
蒼夾壁隘天光亭午依微晃蒙密升雲際危磴纔通丈數武
凡纓息僮御艱扶杖峰巒勢更變雲日相盤盪錯磨生空翠
倏忽名難強飛湍瀉幽壑淙淙激哀響層冰結水簾琅然耿

鶴竚對此披胸懷智理紛觸長無怪朝山人一步一稽顙咫
尺天門豁竦峭儼屏幌王屋秀烟中砥柱轟相向苦竹洗寒
翠青草垂冬壤乃達岩壑盡犬聲出嵒嶙山月已娟娟徘徊
照深廣天明躡峰頂紅旭延清敞石隙綴孤梯如猱據兕象
半空河維影影影在滉漾仙仙屋數椽位設何瀟爽長嘯立
青冥下界空攀仰松栢代烝薪芝苓充餽饌庶堅金石壽永
結無心賞揮手謝煩喧不獨干戈攘幽棲賴志氣願言荷崇
獎

過龍泉舊讀書處

憶昔棲名山日日賞空翠山寒常晏起聽泉夜不寐茲來憇
蘭若雲蘿增我愧浮生意何得役役還牽累無心天一君願
結千秋契

上方園贈泉上人

朝來金谷遊夜宿祇園樹秉燭聞暗泉穿林犯香霧賞妍聆
妙法觀空得真悟桃李雜天花零落不知數

宿靈泉院

人說靈泉松夜夜明月光茲來非月夕清風生微涼上方一
燈懸衆象何荒唐靜坐無聽睹時聞蒼蔔香

石門

萬山奔一城石門當水口仰垂千仞壁清潭俯承日森然敞
雄界包鑄此重厚緬自陶唐年鑿出神禹手炳靈人物萃過
續徒虛有竭來據嶮巖風霜滌埃垢嶽峯萬古心傾寫寓盃
酒誰能隘六合獨後天地朽

天王臺古意

禹貢太岳山今于晉爲霍其陽有侯國自漢澤口獲世邈徒
陽名行沁相包絡墉隍表臺觀千室茲焉託騁望闕十尋川
野漫寥廓青春方送爽朱火遽潛燭老懷苦淹沮尋陟仰我
脚柱析暖層嵐雲生紛漠漠蟠螭落長溪光彩散林薄行次
日將晏物態煥屢作憶昔黃鶴樓橫睇江漢郭寰中識廣大
未若枌榆樂

杪秋遊石塘觀龍潭登九女臺紀事

石塘至臺頂不肯不嶽崎搜剔窮三宿煙霜幻衆姿朋期頻
不易靈鑿若相知誰作摩崖客山川空爾爲

早穀行

炎天六月槐花開黃蜂匝樹如鳴雷樹傍老人坐太息來歲
麥收可得食今歲麥絕夏無雨衆穀罕有苗在土南村北社

盡插血此事老夫聞咋舌盜賊軍興那可數憶昔支持尙安
堵疲牛十百人庖厨赤地誰令感象鳥南山有物號爲礦不
用鉏犁換白鋌有肉可糜糟可醉豈知一價舊三倍帶劍街
頭執袴兒粟死金生眞可爲粟斷會令金已矣虛傳執袴不
餓死不見陽之西南接沁水有田無主漫葛藟

石樓

戰伐幾時休全生乏遠謀無才甘老賤多病信沉浮兩折黃
苔暮風歆青桂秋從人責疎禮隨意罷梳頭

冬日同賈九明經登香臺山

古廟丹青湮壞壁新亭風景入殘杯從禽獵子翻迴去貪食
饑鳶獨下來千里旌旂連朔漠百年經史有秦灰陰陽短至
催寒暑潦倒風塵首重回

聞曹將軍敗賊於聖王坪喜而賦之

龐太樸

殺人者干天和於茲無辜罹網羅百暨千千暨億殺人抑何
多爾乃盤踞山之阿將軍擁鐵騎壯士揮金戈埜戰不用步
與伐但披彼之荆棘斬彼之藤蘿兵氣隨霽色而入差莪渠
魁歛授首脇從盡蹉跎金帛不收委紫陌花鈿不挿泣青娥
箭服魚鼓鳴鼉罷啼鳴聽唱歌殲此草寇不足介四國以此
反側叱

星軺驛

傳有仙人洞

王

鑪

子陶

蔓草斑斑石磴長朝來嵐翠溼衣裳溪山佳處岑樓立澗壑
鳴時衆木涼陰谷雲腥龍夾雨暖風花氣麝含香仙人辟穀
藏深洞無數喬松護藥房

先農壇

陳昌言

澤州府志 卷之四十八
上治本於農務茲稼與穡敢云南畝勞粢盛在黍稷種種包
元氣粒粒匪易得民事不可緩宵晝所當亟無逸知乃艱幽
風其可則姬曆何八百首重在民食

宿天壇王道房

王鐸

齋室非人事冲融似輟冬聞香邀道士聽雪拆巢松門閉諸
天月心閒半夜鐘芙蓉砂欲煉誰可駕紅龍

小山

董緒

有水奚以澗有山奚以童剪榛植嘉木鑿石疏流淙依澗培
脩竹緣崖立孤松種蓮復理菊忘却主人窮

珏山咏月

菡萏峯高勢入雲一峯鐘動萬峯聲怪來秋月因何事不向
從前峽裏明

隱谷

王克生

初月轉幽壁嘒嘒風在林故園不可見日暮空沉吟一夜寒
無跡萬山落葉深野雲與孤鶴隨意度遙岑

留別隱谷

徒然邱壑靜畢竟拂衣歸此地好明月遠山多翠微梵音落
空響林影餘斜暉古石苔應滿重尋路或非

麻樓山

原體蒙

飛來萬仞石孤聳沒青空俯瞰巖前雨平臨天際風啼猿悲
斷峽飛雁避高峯不辨塵寰色蒼茫返照中

鐵盆嶂

田六善

青霄垂直壁危處一龕懸窄路猱猿隔深林虎豹眠岩花開
列嶂石髓滴高天日暮鐘聲落千峯應寂然

澤州府志 卷之四十一
太行道中

歸騎隨春至山山花事芬林深藏過虎壁峭蓄停雲草屋依
巖築荒田帶石耘問知新雨好可慰舊榆枌

析城山南天門

田七善

閭闔中開倚碧空憑虛遠眺思無窮通天却憶車箱路得似
蓮峰瓣瓣同

下太行經狄梁公望雲處

田宅中

嗟哉太行顛上有崎嶇路道傍題片石梁公望雲處公昔經
此山俯見河陽樹回望白雲飛悵然久不去想見孝子情不
忍頻叱馭遊子胡爲乎悠悠祇自誤

嶮山

陳根

秋爽登臨興不窮巉岩壁立鬱葱葱雙泉滴瀝空濛裏高栢
蒼茫迤照中殿古山深儀自肅碑殘苔蘚字猶工欲尋白兔
聽經處指顧龍岩一徑通

仙人洞

張文炳

洞裏仙人何所往丹爐空靄薜蘿烟巉岩枯木雙棲鶴峭壁
青松半插天窻外風雲龍虎穴門前芝草鹿麋田苔封今爲
破無處尋真學叩元

下太行

陳弘度

巍巍太行山高與天齊俯視部婁但亦爾爾疊翠圍兮千峯
延綿亘兮萬里陡折峯嶺脩塗喂蠅勁風驅雲根遠岫沒山
嶺林端落葉鳴木末高鳥起石稜稜碧齒齒今人古人亦已
矣客徘徊其間極目天際但見長河送流水

大雲寺三松之作

天外看松松影無塔前轟轟樹三株當時未認秦官好不許
人稱五大夫

遊析城山遍歷千峯寺鐵盆嶂諸名勝

西南山萬點爭似析城尖路逼蠶叢仄巒紆馬首瞻雲翳迷
咫尺衣露怯零霑石磴蟠車轍藤梢刺帽簷岩花白閃閃徑
草綠纖纖雨歇晴嵐滴灘高細響添壺餐分雪乳樵爨仰刀
鎌茅屋幾人住荒塗五日詹探幽窮奧交問俗絕猜嫌淳樸
還風物艱難藉養恬農箱珍橡栗天產歉魚鹽客意輕軒冕
氓情隔釜鬻範金勞鼓鑄曠土病閭閻谷闔虛堂閭枝稠巨
木粘觀空驅黑業麗景入朱炎赤射琉璃瓦青遮翡翠簾拂
塵尊現佛翻貝沒楞嚴碧蘚前朝碣蒼虬古幹髯藥苗希采
采麥秀已漸漸鷗鳥元相狎烟霞不礙廉迴鞭尋斷道躡屐

歷危貼野性耽麋鹿榮施及艾萊雅梳雙粉黛熊畫四彤幃
履舄行交錯緇黃跡併兼容華同鮑照彩筆憶江淹布席紛
酬勸闡題索笑拈酒香杯琥珀硯溼墨囊囊低拍從喉轉豪
吟觸目占搜腸茗酪苦選境蔗漿甜筋力寧辭倦泉聲總未
厭夕陽林亂影明月鏡開奩却待歌招隱槃阿大浪潛

課白巖書院

尚映伍

出郭尋秋色至山反若春節氣詎有異巘際霜露輕樹黃映
岩碧皴披縉未勻鐘響忽幽動客來僧輟耕茲役爲別築經
始非謬營敢日志育材卽事郊山靈匠作不侈巧乃肯稱我
貧境偏亦易渝慎考與居銘

大雲寺晚眺

張 鋈

青真去安極朝暮空煙中林山一爲懷所思浩無窮蘿雲逗

清少府志 卷之四 一
華月石瀨梳幽風愛此邱壑佳兼之逸趣同寒芳逝可適悟
旨理何通雖無冰雪姿聊以息微躬

香臺山唐太宗廟

白方鴻

挽葛盤旋上碧岑荒臺古廟栢森森陰廊白晝龍蛇走畫壁
蒼苔猿鳥吟祝歲三農思聖澤吞蝗千載識皇心烝嘗異代
今誰主俛仰明良淚滿襟

紀災步家東谷先生六十韻

白象題

豐歲大化功老稚享天祿及茲饑歉候俯仰空碌碌人生幕
席間遽廬中一宿何事草草身蒼黃邁百六歲宴氣坎廩炯
然蒿雙目郊原行迹稀簡淡守茅屋茲晨盥頰已交疏映初
旭蘿壁竹氣浮茶竈松風謾下帷披素帙琅琅勤我讀緬函
有甘味入理若醞醑如何方寸中顛倒愁千斛感時發浩歎

酸淒刺心腹傍徨顧我鼎屢空無餘餽天地胡不仁四野色
黯黷慘傷有殊狀誰削賈生牘催科檄飛雨鎗鎗競迫蹙百
里風蕭條有日難舉矚青槐貴遊士驕馬追華轂含沙射行
人飲羽如毒鏃竟不念欵器被水滿則覆盜賊若蠹起邨邨
遭荼毒百家唯一存荒原鬼夜哭饑寒殆斃身疇可以理窮
唯有固窮人日暮吟躑躅往者闔閣子娥眉雲鬢綠不語驕
春煙邀人著羅服可憐鳩鵠形慙慙將就木僵卧紛如林骷
髏蔽山谷熒然鬻肉人人旋鬻其肉作受俄頃際駢首蒙顯
戮匪無膏腴田丁盡誰爲鬻大東與小東不獨空杼柚負販
梗中道行旅絕水陸菽粟價比珠何以安淳朴坐困及紛攪
片晷分禍福寧爲螻蟻貪以快得生欲藐予一腐儒目擊茲
澆俗抱膝歌考槃永矢亦弗告積雪障頽垣寒吹日晷速蓬

蒿三徑滿門館常肅肅觸事雙耳熱激切揚哀曲一唱金石
悲再賡多斷續憤比漁陽搥慘如燕市筑仰視浮雲翔淚下
如潰瀑短劍缺光輝狀容失膏沐生產素未語儉穀勝豐玉
低顏向親故祇有意相屬舊日識面人強半登鬼錄畫餅不
療饑寒心但穀棘繪圖手不舒請帑類觀局鼓瑟者誰子弦
急由枉促眷想含舖世帝力因材篤感此庶翁旃行當勸掖
浴朝夕敬操存俗緣毋往復靜守一牀書知足可不辱苦樂
由蒼旻下民誰怨讟日暮數飛鳥孤雲亦相逐感發朔風吹
拚關三冬足奮飛借羽翰利涉仗舟軸幸甚此才遺漸漸牟
麥熟

登鐵盆嶂

霜風吹薄裳獵獵盤亭路霄漢插羣峯揖讓迎馬步我聞古
至人卓錫雲深處每歎湖海姿久昧桃源渡巒嶂忽蔽虧
利因幽護山花漾清馥哀猿繞深樹奇哉咫尺潭幻邈涵靈
趣夜闌豺鳥嘯嘒響高雲度月色映空林悠然發深悟

米山定林寺

畢振姬

黏天峰側野橋灣米子開州直寺間白鹿去來小朗洞青羊
今古大糧關詩禪四壁香留座宦學三年御見山回首懸崖
清入夢石淙花雨水潺潺

弔楊渭南死事

蓮嶽青天絕西風戰血收荒城鬼火斷落日禹河流直道榮
今古藏書信魯周文章功罪核君父死生憂薤露眠孤鶴烽
煙噪野鷓汧山焚舊誅樗里杖新楸石凍蛟龍雨蕉寒士女
秋旅魂宵練蟄歸路晚潮留宿草魚鱗變溫綸馬鬣酬陰房

招未得關月慘蘆洲

雪後望吉祥寺松

雪隱禪花石磬閒上方僧衲帶雲還一龕冷浸琉璃鏡門外
蒼龍吼萬山

夏遊西山

鐘聲午樹隱胡麻十里山椒見一家古廟毀垣苔半合畫龍
提雨石壇霞

野老逢人出遠田新煎大麥捧茶煙坐中指點神叢裏沙石
牛畊四五年

重過與樂園爲王公冢宰別墅百年三易主感賦

張道湜

立馬斜陽晚苦吟披荆重問此園林倦飛鳥訝松篁密樂水

魚忘荇藻深芍藥欄西新曲澗荼蘼亭北舊遙岑徘徊獨見
雕梁燕猶切當年故壘心

九月七日韓明府邀飲君子亭

雨洗秋空淨亭虛綺席開霜林紅似錦山翠碧於苔道氣薰
談席光風拂酒杯半規林際月同我意遲迴

沁水道中

孤城西扼河東吭宿莽深林道路艱雙澗合流梅杏水兩峯
俱峙北南山田夫荷鍤鋤雲去餉婦提筐汲月還公稅早完
秋社罷繞籬雞犬夕陽間

荒殘後早發沁城書所見

宿鳥初翻野色昏過橋猶見曉星存峯巒翠鎖疑無路樹杪
烟寒知有村草宅頽垣鼯鼠穴雲埋古道虎狼屯隔林牧豎

驚行客驅犢山頭自掩門

大雲寺

入負東林約重來眼界新細論支遁法羞說宰官身世路空
知已山靈解媚人巉巖松畔石蘚駁老龍鱗

中秋青蓮寺歎月臺

王 度

雙峯突兀三千丈孤月圓明萬里天人世紅塵飛不到白雲
深處老僧眠

感蠶

趙 介

未繭先蠶供三眠未錦先絲機杼艱既成羅綺官責貢用之
或卽等蒯管吁嗟蒯管之羅綺絲絲抽自百沸鑊湯裏再欲
抽時蠶已死

孔子迴車蹟

攬轡何年入晉關豈遭按劍載愁還頓辭斜日行山路仍帶
春風闕里間半嶺塵蒙車轍跡千秋霜冷墨花斑遺踪今古
知多幻且學傳疑未敢刪

長平坑歌

王士祿

虎狼之秦胡不仁銳頭小兒服振振劫灰更促括也將一戰
趙壘成埃塵白骨嶽積四十萬至今此地無青春丹河水繞
發鳩麓指點當年趙兵斃土人往往坑旁耕拾得殘戈或斷
鏃鏃頭長以寸戈頭長以尺持將磨向丹河沙古血猶腥土
花赤省冤谷接武安臺南來遺跡仍崔嵬應共髑髏山下月
夜深同對鬼燐哀

東烏嶺

荒絕東烏道蛇盤路百重崩崖歛赤石墮嶺軋黃松徑仄猿

聲苦林深虎氣濃傳聞停穆駿恍惚想遺踪穆天子傳所云
銜鏗即此山也

澤州使院古松

三株並是青牛質久愛欹松亞復盤入夜龍形殊益怪隔窻
濤響不疑乾人如僧憇心堪寂舞作胡旋勢未安韋偃畢宏
那貌得祇須拭目百廻看

荆石邀遊石樓山作沁水

昔讀石樓賦何大復為邑
人李尚書作名山思恍惚神構超意匠頎然秀

天闕安得一稅駕陽阿試晞髮比來梅水上城頭見巖巢故
人約我遊韞系不及結數折出虧蔽靈境果秀發削壁疊蒼
綠千仞積寒鐵壁上青松長虬然森五鬣布席踞平崗于山
呈凹凸所惜仙人棲已為六丁坼墜石鎔古苔悠然想遺跡
侍者况能言縹緲生指畫更詠信陽詞儼揖樓居客

夢榼山三白松歌贈邱沁水荆石

故人邱明府六載始會面執手便詫榼山松人間蓄眼誰曾
見夜來遂有夢夢入千山東陰霞截嶺復截樹滅沒隱見皆
乳龍蓮宮三松尤絕奇兩松磊磊一微欹十人縈手方合圍
氤氳恍有神靈棲老幹怪石色古雪纓垂劒拔紛威儀玉樹
青葱那足侈密縣子子空爾為心駭日眩忽大叫驟迴奇夢
徒嗟咨詰朝問明府此境何所似明府拍手向予笑吾榼髻
髻乃如此乃知奇物誠有靈神之聽之宵夢形儻能夜夜攬
森爽何必青山曳杖行

發陽城

陽陵信宿復東轅晨傍雲霜辨遠村沁水千迴緣麓足嶺田
百級作堦痕析城林岫艱筇笠王屋煙霞惹夢魂况去扶風

遠絳帳中懷惻惻詎堪論

食半翅二首

朱彝尊

賦物憐窮鳥營飛日幾迴遠依黃鼠穴低捨白龍堆不用深
弓射恒愁短翼摧年年隨凍雀重馬紇干來
味合添雛笋羨宜配凍醪登盤人未識入肆價須高且緩思
鴉炙全勝食雉膏莫愁嘗易盡讒鼎戒貪饕

題午亭山莊圖

相國澤州公里
第十二首選四

查慎行

天井西來第幾陁浮嵐千里拱翠屏井西道人畫不得自有
此山無此亭

萬丈光芒臨一州宸章奕奕垂銀鈎煙霞指點最深處中

有御書縹緲樓

午壁午橋名偶同住名豈襲裴令公屋頭山色屋下水多載

桑經鄭註中

展卷尋常思釣遊太行天半阻歸軒誰知老鶴出羣意早在
千花塢上頭

長平行

官于宣

古今有奇慘莫過長平道冤魂四十萬飄零成腐草驅車已
昏黑殷勤進父老父老前致詞往事傷懷抱使君且秉燭賤
叟請具述竊聞周命衰奸雄羣逐鹿秦國類虎狼盛氣欲吞
六初猶親穰侯既乃得張祿不敢兵加趙所忌頗與牧千金
行反間奇兵試埋伏蚩哉趙家兒曾把父書讀年少初至軍
盡更諸約束上將未知名佯敗即追逐堅壁不得入覘臺已
新築絕糧五十日人馬齊枵腹勢窮自搏戰徒死恐不速數
十餘萬命一旦填溝壑何曾聞鬨聲解甲坐受縛屍積凌太

行血飛噴王屋 命娘與妻子何處認爾骨膏漬少波瀾河染
成丹蘄猛獸飮 心肝饑鳥啄其目一飽不再過污漬無復肉
廢竈寂無烟枯 顛白似月嗣自逢天陰迤迤聞鬼哭燐火暮
趨人日落不敢 出夜坐影危疑獨居神恍惚傳自唐元宗題
作省冤谷置封 骷髏王以鎮厲鬼族至今存有司祀典不少
闕農夫田間來 古跡時發掘戈頭黃金花箭頭青銅簇出之
與衆視制廣鋒 稜薄戰國養兵器近代無此物太息彼趙王
豎子亦推轂垂 老廉將軍揮淚見覆没人信惟舊善敗能
不辱秦將武安 君窮克勝檣杌螻蟻昧人命萬死正莫贖逆
料邯鄲圍秦師 勢必屈此亦有良算誰識蒙顯戮殺降至不
祥况乃恣荼毒 更聞新安城楚亦坑秦卒趙卒爲秦坑前後
慘相續天意如 轉圜物理有報復每思全盛世脩德耻館驛
始知兵不精百 萬徒碌碌今茲王報庄一帶戰場曲風雨洗
腥臊山河靜草 木賴見人烟稠且慶嘉禾熟俯仰數千年雜
聒屢更僕我聽 父老言我爲父老祝千秋殺氣盡永介斯民
福

奇松歌

天下有物奇至此奇氣生物物不死蟠據城中併署中得遠
人害全生理寒 柯本自宜霜雪偏側公門觸凡熱高卧雕牆
亭榭間南向低 垂曲欲折千年百尺不干霄遲暮孤危氣所
結人物各自有 不朽螻蟻俛俛求其穴耆舊尤憐廟社材精
神未許山川竭 縮伏難馴鱗爪舒屋瓦皆震華簷虛草堂偃
蓋萬間厦石磴 叢陰一卷書平地咫尺欲生雲慘淡濤聲不
可聞駟馬高蓋 常掩映選石題壁徒紛紛恰似山中一老衲

不記人間有伏臘問爾前此年幾何爾亦笑不答人生百歲
日期頤似此悠悠未有期問爾後此年幾何爾亦謝不知鬱
葱不爲占佳氣蔽芾非緣墮淚碑爾年則已老爾材則甚大
老大自昔生人悲羨爾童童無有害爾幹則稱奇爾根則稱
古奇古遊人發興多爾更逢場恣狂舞風雷不拔見天心烽
燧無災關氣數搖落百感關塞哀初終一節歲寒苦昔我登
蜀道幽討開懷抱先王廟與武侯祠參天松栢平荒草今我
來濩澤政餘試搜索槐神會祭副倅廳五檜頻過賈相宅更
得與爾爲比鄰謾謾和風生肘腋晨昏盤礴于其下可惜時
無善畫者畫之只成近代色奇松欲傳傳不得似此庸工最
悞人責之返余絹與墨吁嗟乎九天之上露濃濃大樹將軍
大夫松爾乃終身作卧龍凡物淪落亦不偶此中狹隘難爲
容余將移爾入山深又深虎狼魍魎日相尋屐齒所不到斤
斧所不臨俾爾優游踞肆此以終其天年爾胡爲乎安土而
重遷衆草甘與伍凡花亦併肩余將斬柔條之荏苒禁僞父
之流連獨留脩竹與爾周旋從此携朋訂幽酌松子細細杯
前落歲暮擬作遠尋梅巢空長憶未歸鶴吁嗟乎翹首堂年
鐵印開豸冠樹下幾徘徊如今巡行罷繡斧不見乘驄御史
來

遊小山

有水在山裏有石在山間應題一片石號作小寒山不逐烟
波去空憐砥柱間點頭堪共語坐拜正非頑

黃園洞歌

孫必振

黃園之山山谷口夾崖長林風怒吼曲磴嶙峋鳥道通扶筇

鼻鼻全緣陡峯回路轉現琳宮老衲藏脩時歲久爲言洞中
別有天登探欲把塵襟抖洞口霏霏煙霧輕莊嚴妙相當
牖座後突兀說法臺寶塔玲瓏三五耦石乳懸空滴蔗漿龍
泉清冽嗽瓊玖四壁斑斕翡翠屏鳳篆龍章雜蚪蚪石芝倒
掛白鶴飛石脊蜿蜒蒼螭走更有幽奇探不窮洪濛浩氣忘
昏酉肅肅陰森衣袂涼炎天六月歸何有遊罷玉樓肌粟生
幸有高人載斗酒把盃長嘯響天風欲起何妨時被肘村農
皓首喜相從不減山陰五老叟魚羔蒸黍酌使君使君莫負
攀枝手秋來紅葉滿山隈乘興還思來再否

謁李衛公祠有感

陳元

層嶺遙登拜古祠晉陽勲業歎何之千秋廟食傳今日百戰
功名憶昔時苔鎖深宮人到少霞封古木鶴歸遲撫時不盡
興亾感何忍英雄鬢若絲

謁昭忠祠

趙鳳詔

忠烈高千古聞風仰峻名繡衣人已沒鐵骨氣猶生北塞情
何極南陽義並衡緬懷慷慨日如聽浩歌聲

東司四友

庭有一栢三松
故以此顏之

汪灝

忘年好友齊高潔歷盡太行山脊雪相望相守遠俗氛有風
長嘯無風歇蒼煙明月影婆娑未許凡枝接素柯不見商山
惟四皓古來高士不能多

再過濩澤試院喜瞻老檜有贈

露重香清散碧天風輕濤細響幽泉與君似訂三生約許我
能逢再晤緣應解舊囊無長物轉憐新雨結蒼烟良宵舉酒
頻相酌欲共掀髯話月圓

魃

韓蘇

沁河夏挾山溪水泥跳波立舟難侍今年舟閒沙石間深不
及腰淺踰趾並河有湫龍爲宮益益下與滄溟通投石怒龍
使龍雨龍不見石人無功或言魃鬼龍之子此口生兒敢浪
喜魃之形狀如小兒兒名以魃從誰始兒邪魃邪成人口邨
邨號召澆龍母騎危抽桶千夫洵可憐驚殺人家婦吾聞將
旱魃乃至不聞魃力過天地巢居知風穴知雨風雨豈由一
物致有如風雨由一物庭前螻蟻何妨乞

遊九龍洞

白畿

溯流方幾折一水向仙源石氣青岩壑溪雲綠洞門尙留殘
竈冷重破古苔痕孰是韓終侶樓心訪道言

後里選行爲汪天泉先生作

陶自悅

我讀尙書里選行頓使遠望長咨嗟虞周掄才隻千古後來
取寵世可譁孝弟力田差近矣廬墳割臂爭弔詭唐家詞賦
披朝華歎息曲江無杜李當時通勝爾何人十科宋制非呈
身限以帖括始畫一學校養士士乃醇茂才之舉仿里選王
佐真儒門各扁昭代相仍踵故明經義何尤訾未免名實
乖違俗漸成章縱往往雜獮僨法不弊人人治法袁袁州後
惟臨清尙書慷慨論前事再慶斯文弗墜地煌煌三晉火薪
明百餘年來僅有二高都行部世果無天泉先生雙眼珠一
顧能令空萬馬囊誰處穎鳳誰筴請託貨賄兩無用幽潛鼓
氣歌交衢賤子毛椎弱歲弄袖手旁觀色屢動愧無硬筆繼
尙書山鳥啁啾夾吟諷噫吁嘻風頽習壤良有由才不才兮
襍並收江陵舊令巖澄汰文章詎等軍旅謀此事刻急不足

道蕩滌何如清濫冒安得公輩十數人管領八埏弘有造會
見一歌再歌樂府傳改竄賡颺入典誥

題衛定遠友山園

友山主人一世豪少年勲業輕蕭曹思親忽罷封侯志白雲
飛繞行山高州城大宅曠不處還向故山尋素侶千古交情
孰久要惟有山靈默相許踞山築園名友山友山主人樂且
開嘯歌有時互響答風雨不變真容顏友山得泉山頂瀉我
友心期倍瀟灑伯牙鼓絃鍾期聽世間那更知音者重樓複
徑相廻旋遊人往復迷洞天蓬萊方丈金銀闕誰云富貴非
神仙我亦青山舊知友荷衣猶掛門前柳願乞友山作主盟
雲關他日來重叩

南歸自交城行至太行道中即日書寄從弟崑霞

洪嘉植

孤雲十日太行連行過交城澤潞邊藏雨溪聲春水確焚菑
山脊種梯田楊花吹麥經冬雪蠶女條桑彈曉烟風土民生
衣食在封書爲報長官賢

遊定林寺

李棠馥

逕縈紆上扶筇到碧岑天香飄法界秋爽徧空林樹色聯
旛影泉聲和梵音陶然塵俗遠攜手共長吟

小春遊法雲寺

攀蘿穿石徑直上翠微顛巒聳瞻天近峯孤得日先蒼茫平
野色縹緲戍樓烟身出浮雲表啣杯意爽然

弔楊渭南殉難

西秦驟起石尤風函谷丸泥一旦空司馬隻輪去弗返赤眉

萬隊入關中宵遁伊誰金百鍊牽羊肉袒無人戰首抗逆鋒
 獨渭侯登陴欲發殲渠箭重圍四望絕援兵羅雀掘鼠無堅
 城拜闕遙呼臣力竭有懷曩革豈偷生賊欲仍官莫予毒髮
 指罵賊義不辱杳爾乘箕頸血鮮河山氣壯作臣鵠事聞天
 子為撫膺西望哭師悼二陵嗟乎渭令千秋節贈卹如綸重
 百朋化碧九京堪不朽汗簡傳馨天地久東流渭水隱悲聲
 英雄何事逢陽九

洞陽山

陳廷敬

我家太行盡處邨蛟龍欲落留爪痕蜿蜒腹背故隆起振鱗
 掉尾如雷奔波濤隱見吞萬壑似覽眾水窮河源古稱上黨
 天下脊茲山拔地尤騫騰俯視砥柱一卷石析城王屋雙杯
 樽頗訝大禹所經畫足跡未到回南轅徑下河濟急疏淪北

顧參井高莫捫乃知龍性躍天漢肯同蠓蚋尺水渾太行以
 南多峻山地勢愈下難並論茲山何不列嶽鎮使我歎息增
 煩冤何為歎息增煩冤萬古無害茲山尊

開元鐘 後唐李嗣昭守上黨勝梁範銅為鐘在開元寺後置元妙觀

蒼茫陵谷開元寺古鐘猶帶開元字尋向桃花觀裏來鐘聲
 依舊浮雲翠此鐘流傳自後唐誰與作者李昭義黃塵清水
 變須臾鬪鷄小兒聊角戲昭義此時亦人傑屹立孤城下無
 地夾寨重雲鳥不飛余吾殘營白晝閉流矢拔足客不知血
 暗淋漓痛劈臂龍驤神捷等沙蟲銘以蒲牢毋失墜生子當
 如李亞子進通忠孝先王識我怪歐陽傳五代嗣昭特書多
 可紀當時亦有劉蕤叟飄零頗恨文章躋今我來觀開元鐘
 與客談詠梁唐事更數百年歌者誰鐘聲未歇聞歎喟

自南村徑石院抵九仙臺

紅葉深紅與淺紅
溼雲細雨如春濃
桑柘半凋柳黃落
三里村村同徑轉
溪開歎竒絕
千山萬山皆玲瓏
誰令巖壑擅異色
純以金碧施神工
寒烟消歇亦變態
怪石磊砢還孤峰
宇內名山亦無數
此山如畫展毫素
我聞虞山最佳麗
丹崖紺壁儼畫具
一峰道人飛仙人
揮染平生釣游處
浮嵐暖翠曉千里
玉洞桃花春萬樹
仙人既去亦復還
白雲黃鶴游人間
清都渺渺在何許
玉階朝罷棲名山
只今畫者誰其匹
天高氣清風寥慄
欲攬太空為粉圖
消得仙人兩三筆

九女臺北黑龍潭

維南有金焦江間屹不動
詎知砥柱東山起
挾河縫河流兩汭
汭汭此山磬而控其北
皆連峰排接故縱送
陟崖臨數仞潭

水鬱瀕洞相傳是海眼
仰口若大瓮鬼工施鑿
成人力匪所用
俛視悸心魂危立仗
僂從四山下驚風崩墜
影與其取道青石叢
出險衆聲哄此中龍潛
棲禱雨屢則中古祠
明月高秋軒發幽夢
囊中五絃琴改調一撫弄

南村

煙中見南村窈窕徑
迷舊陟危驚景佳問俗
訝名陋陋村其名丹砂一林染
鳴玉衆泉激傍巘開荆
扉雞犬喧清晝幽興未
云足古道迎隻屐

宿石淙院

山房行欲近半空
人不知微逕礙古木
青靄來差池鴨脚寒
已亂鳥翼昏相追
林開孤煙出飛崖落
厯厯巨靈劈左股
元氣猶淋漓森巖驚
鬼物幽險疑蛟螭
石坎象鐵盆千古垂流

澌淙淙一線長晴雨無盈虧逝者有如此吾生幾何時

析城山

河東形勝古王畿蒲坂南來壘嶂奇禹貢山川連底柱唐風
宮室盡茅茨陰埋半嶺雲車過翠入中峰雨腳移極目下方
千萬壑樵邨歸路客先知

論晉中詩人懷天章

摩詰秀千葉柳州儼天人義山最崛起流別自有真上下五
百載遺山接清塵自餘諸作者海山羅奇珍嘗鼎分一鬻已
足甘喉唇鄙人老無學枌榆私所親豈惟鄉里賢名與天壤
新我初慕聖道矯首思河津緬維三千篇刪述垂千春大雅
久凋喪風流隨波淪昔者卜子夏論詩河之濱沿洄溯洙泗
餘潤沾窮鱗文章寧小技矩矱存先民以茲慰衰晚奮翼攀

鳳麟既得金鵝子

金鵝天章齋名

刮眼辨玉珉子居玉溪上義山舊

卜鄰况復龍門峻岿堯臨高旻執鞭今所願參駕豈同倫蚍
蜚與大樹天賦理則均撼之適足笑安分不失身扁舟阻千
里寸心無由申所期鄉國間詩教還清淳

秋日往石閣

捨策登險艱窈窕窮清秋溪流沙徑細草長荒陂幽日高臨
往路亭午陟遠邱舊居渺叢爾中有萬古憂迈躬集悔吝闕
世紛愆尤迹跡心逾危憫俗行且休遊戲采芝藥芳序忽已
道羨門不可即徐生入海求仙者良冥漠塵埃難久留何得
奮翎翅遐舉陵滄洲

太行四首

天井關門跨碧空太行開闢想神功遙連絕塞羊腸盡下視

澤州府志 卷之四十一
中原虎踞雄嵩嶽諸峰
元拱北河源萬里遠隨東驛樓斜日
憑軒意回首蕭蕭落木風

家山歸處路分明北上車輪夢裏聲
每憶梁公如蓋語高歌
孟德苦寒行橫遮四塞如長塹俯抱三川似列城
午甓亭前方畝地祇應耕鑿足吾生

比似人間路較強崔巍歷盡亦康莊
嵇生未解青泥飲孫綽
空登赤石梁少華西看峰影小大形東望海雲長
遺民敢笑唐風陋山水連天接混茫

絕嶂登臨興未孤白雲迴合盡平蕪
界分韓魏初盟土表裏
山川舊帝都會度千峰趨大漠懶從五嶽問真圖
更看天上黃河水長作巖前雪練鋪

過海會院二首

川長塔迴費躋攀路轉溪雲杳靄間
石鏡泉鳴寒夜舟翠屏
鳥拂曉春山上方色界諸天靜
雙樹香林萬象閑除却山僧
與樵叟松門無客不須關

浮圖金碧照山隈略約橫斜隔浦迴
鐘動幽林風葉落鳥銜
空翠雨花來引泉不礙孤生竹
埽石長防未破苔曲徑禪房
容易高亭還對野塘開

東山上懷古之作

太行南欲盡萬里勢猶雄地迴標河朔
川長起岱嵩六卿空
晉土二典自唐風遠遡龍門業誰當
繼史公

登月院山普照寺

樹杪水濺濺羣峯矗碧天松門留曉月
板屋過流泉谷口山城遠窻中鳥道懸
前林少人跡寒磬下溪烟

遊可寒山乾明寺

窈窕溪山路孤峯迥自尊秋花隱危石斜日到閉門鳥影烟
中寂泉聲雨後喧法雲堪倚徙不擬向前村

重遊碧落寺二首

十里荒寒路栖栖續舊遊泉鳴松澗冷雲卧石堂秋粉堞山
城古香燈佛火幽畫龍猶掉尾飛去殿西頭

碧落天邊寺青山有夢尋逕迷初地遠人覺化城深猿鶴三
秋意鐘魚一昔心到來想陳迹黃葉滿前林

珥山

鐵鎖鈎梯細磴分半空時有鳳簫聞雙峰夾送三清月萬壑
全收太岳雲插漢桂榆垂欲下摩霄龍鶴動成羣人間何限
卑棲意待剪香茅嶺上耘

青蓮寺禪人方丈二首

明月高高在上方禪心不任水流長掃花風定苔依徑穿樹
鐘來葉滿廊白社南朝常侍宅紅樓北寺贊公房杪櫺別院
清涼境惟見威儀古道場

寺名不媿是青蓮始信人間別有天花比金輪寒映月藕多
玉井大如船吟身漸老知詩妄愁鬢新稀識酒權欲向支公
聊問法可憐神駿意翩翩

午亭山莊圖詩五首

有序

酈道元水經注沁水逕午壁亭而南友人朱竹垞謂予何
不取以名其園比同在內直輒好語山水園林之勝於是
玉峰尚書爲作午亭記當此時予未嘗有園也已而家居
關山村股濂泉之水鑿池其中橫橋小舟咫尺具煙波之

勢以實竹垞之命果有午園矣蓋予所居樊川終累牧之
城南下杜之稱思有以別之且吾居近午壁亭沁水之涯
也爰卽樊川故居又名曰午亭山村午亭之間山高水清
林廬池舫幽居之跡則王君石谷爲予畫焉使玉峰而在
當爲更作一記他日請竹垞爲予記之夫五畝一區而爲
名之多如此甚矣夫吾之溺於其名也

午壁亭名載水經秦時流水漢時亭何人更與桑欽注一畝
園中水木青

午亭人在翠微間林際清暉自往還砥柱析城至王屋天教
看盡好雲山

吳淞煙雨石湖春不到江南老竟真山水連天溪艇窄也能
作意向詩人

西湖杭穎別圖經吳楚湖山兩洞庭獨訝樊川同小杜朱坡
不比漢家亭

丹青老手荆關筆重寫天隨舊釣船晚喚午亭還識否世人
曾擬杜樊川

老姥掌

夜靜山月高照我山樓上微聞松蘿風遙遞石泉響

七柿灘

秋水落汀渚古木餘磊砢山家黃葉村晚紅拾霜顆

兔垞

茲山數峰落一峰出一泉尋泉杖輕策遙見墟中煙

西垞

朝爲西垞遊暮爲東垞宿谿行人不知野橋夾修竹

西山院

落日清磬響數峰相對閑復此值秋色坐見煙禽還

樊口

樊山南下處十里到樊口春風夫如何惟見花與柳

沁水道中

谷口千巖合關門驛路分秋風迎馬首晴日亂鷗羣峽轉黃
厓水山開古鎮雲孤城何處是礎杵急斜曛

宿榼山寺天外樓

祇林迴望沁流明數里深山到漸平翠柏不隨雙鬢老白雲
常共一身輕高峯月上僧初定亂水風多鳥自驚新桂舊松
青未了半生難問况三生

再遊乾明寺二首

峰腰雨歇野雲留晴樹斜陽在上頭野蘚全凝臺殿色土花
半老繚牆秋丹青照夜餘神鬼河漢陵空近斗牛除却牧闌
樵鳴客何人解作看山遊
千峯排浪湧遙空一抹雙林磴道通山暝僧歸紅雨外樹深
鳥度碧煙中澗泉色冷元無暑松閣聲多豈爲風擬學香山
老居士往來踪跡似秋鴻

石澗道院二首

空山小住又經旬草屋孤村無四隣咫尺夕陽連暮雨三叉
古路少人行牛闌嶺上收常蚤虎跡泥中見又新寂寞不嫌
樵牧者來時一別一傷神

急雨清宵古廟中長松小院下秋風時疑石澗翻驚瀑頓覺
巖泉接灌筒遠夢關山雙鬢白鄰鷄離落一燈紅到家却作

無家客襪被衝泥類轉蓬

小山

城西前日吾來處野徑清流竹樹斜日暮出城拚一過不因
水石爲思家

合和羹二首 并序

合和羹雜菽麥野菜爲之太史公所謂民之食大抵飯菽
藿羹者是也然自秦及燕趙皆食之而南方聞者每竊笑
焉嘗與南溟湘北宿左闕下二公皆南人而獨喜食此且
爲歌詩以見贈余亦和而歌之所以志余之辱交於二公
亦以物之幸而見知於世有如此也

衢歌含哺敢忘情華省翻憐麥飯名不笑唐風多儉陋茅茨
曾啖小人羹

鹽豉休烹婁護鯖山蔬點就瓦盆盛交情淡久真如水肉食
何人憶太羹

棲龍潭

斷峰臨巨壑開闢意何雄石口排雲黑潭心浴日紅人傳是
海眼天遣作龍宮萬象蒼茫裏風雲起澗中

遊底枉山入天井谷衛北山遠來餉食兼簡衷明府
靈壑青峰入望頻鞭絲烏帽映嶙峋尋山我愧謝康樂好客
人稱鄭子真空谷乍逢如逆旅斜陽立語見交親因君憑寄
神明宰玉洞丹砂不厭貧

王屋山後十方院二首

緝碧千峰萬仞遙靈風飄緲近三霄玉玲瓏處紅塵斷也恐
仙人太寂寥

三山碧海夢魂勞欲往從之心鬱陶天上豈真足官府故來
人世寄牢騷

鐵盆嶂三首

空青削山峯金沙裹山麓山頭明月行山腰白雲宿
探竒乃大驚嘆絕但狂叫山僧渾慣見對予發微笑
風洞聞風歸雲窩見雲去乃知風與雲生自無人處

太行

中條西去北居庸迴合千峯與萬峯六國蔓延連五代茅茨
不改古堯封

沁水

涇渭由來特地明風迴轂轉石波聲故知一道清流水流出
黃河徹底清

析城道中望樊山

松雲縹緲倚高空無數煙巒遠望通底柱三山皆拱北太行
千里盡迴東登臨早識隨刊意開闢深知造化功家向翠微
多處住芙蓉九點落當中

樊山一名芙蓉九蕊山

濂村踏青詩

陳豫朋

濂泉鑿山翠濂村傍山曲何人解往還地偏遠塵躅環流清
且漣一雨添淨綠花光浮瀲灩柳綿飛斷續初晴東西垞喜
見桑麻沃開襟竹裏風欹枕松間局勿負眼前景且盡杯中
醪

樊山百鶴阡西古東嶽廟兩階各牡丹一本黃蛇守其
下人莫敢攀折枝榦輪囷四蔭花開輒數千頭也
古院幽深花信遲露凝風綻一枝枝仙人亦逐尋春夢宮女

澤州府志 卷之四十八
偏當入道時醉倚闌干迷蛺蝶香沾袍袖透胭脂不緣天上
移來種何事靈蛇永護持

老姥掌同孔雲岫

萬疊雲嵐細徑幽翠微深處恣閒遊澄泓自有龍潛沼縹緲
渾如盪結樓林際翻翻松子熟石邊蓓蓓藥苗稠詩中畫意
山中景都付倪迂筆底收

可寒山乾明寺

絕壁生寒雲高林下斜日崎嶇歷鳥道步屨增凜慄扶筇見
丹楹清磬半空出曲徑幽以深流泉清且湍老僧來相迎禮
數任坦率餉我霜柿紅味其比盧橘爲言蒼翠間勝賞推第
一時序屈嚴冬朔風飄瑞靄漫空飛玉塵凍影萬峯密茲山
獨靈奇雪花落旋失疑有神物憑渺茫不可悉棲隱孰何年

言采芝與朮

端氏城

山行百餘里竟日少人烟白石滿沙路青油老竹篔簹鐘沉
峻嶺雉兔走荒田曲疊溪流迅荒城背遠川

高平道中望城北人家二首

僕僕征車塵滿襟故侯池館北城陰粉垣畫閣斜陽外似隔
蓬山十萬尋

望去疎村一徑斜春風未放小桃花酒人會話當墟地白板
雙扉第幾家

夜集秋木山莊呈別光祿王公兼別松坪

骨肉情原洽何須更主賓玉人小子愧冰鏡阿翁真夜月三
升酒春風十丈塵西征明日路泉石羨閒身

松坪請
散在籍

午亭村燈火

獻歲十日煦條風勾芒御辰淑氣濃未幾昏霾雪意惡寒威
頓失春和融彌空蔽谷飄玉屑兒童增愁女不悅東鄰西鄰
各愀愀怨說今番負佳節霏霏直屈試燈天曉來阡陌驚喧
闐妻孥喜色爭致語一簾初旭收雲烟老夫僵卧乏清興欠
身強起但姑應披衣獨倚最高樓頗訝陰晴預難定陰胡必
嗔晴自佳牀頭急覓雙芒屨出戶景光豁心目健登北嶮臨
東厓良宵爛漫正三五追歡是處轟金鼓峯顛水涘照灼爍
千枝百炬奚足數碎鎔鑛鐵盈洪鑪絕技之巧天下無火樹
銀花幻莫測凌虛擲地紛驪珠倏焉硝焰眩紅紫尋文竿頭
疾於矢電蛇驚掣霹靂飛緩步移時觀未止西偏棋布兼星
羅赫蹠障蠟筠作柯諺曰黃河象九曲魚貫而入肩相摩傍
知心光毫相有真過物外恍惚終難憑腐儒心魄爲動蕩再
拜中庭謝靈貺何曾辦作劉更生下照乃辱青藜杖昨朝黃
華濕流神所憐今朝金門佛燈佛作緣紛紛世議何足道盡
付馬耳春風前

送詩人秦畧歸蘇墳別業

三月不見君渴心欲生塵論文一樽酒雅道誰當陳昨朝見
君臨水句乃知抽青配白非詩人南山明月北山雲恨君不
作由東隣擊鮮爲具非無好事者天隨杞菊年年新石田茅
屋連蘇墳兩兒力耕足養親君詩或者昌晚節不應道路長
逡巡白髮刁騷一幅巾豐年鄉社樂閒身蹇驢馱入醉鄉主
袖中知有睂山春

西溪二仙廟留題

期歲之間一再來青山無恙畫屏開出門依舊黃塵道啼殺
金衣喚不回

天井關

石磴盤盤積如鐵牛領成創馬蹄穴老天與世不相關宣聖
栖栖此迴轍二十年前走大梁當時塵土困名場山頭千尺
枯松樹又見單車下太行自笑道途頭白了依然直北有羊
腸

題張彥寶陵川西溪圖

松林蕭蕭映靈字爍石流金不知暑太平散人江表來日評
清涼造仙府不到西溪四十年溪光林影想依然當時膝上
王文度五字詩成衆口傳忽見畫圖疑是夢而今塵土洗華
顛陵川在太行之顛蓋天壤間清涼境界也江淮太平散人
題詩東明自謂已造仙府恨居民不知其樂耳此縣先晉

曩聞聖王坪高出西山顛垓北路盤屈磴道相鈎連暮春月
晦日興至整吟鞭穿林驚夜鹿舉袂陵飛鳶再上得盡曠漸
入清虛天成湯有遺廟殿閣殊巍然神靈夙所著展拜抒寅
虔五百壽龍窩一一舍其泉虎豹絕踰伏荆棘無蔓延奇葩
尙寂寂山有胭脂花天下所無細草初芊芊非關氣候異還因地勢偏
意愜羣安息境越凡塵捐石髓恨難識蘭膏愁自煎頓思脫
世網擬欲從真仙浮嵐忽沉冥風雨來飄翻返步毛髮森回
首空雲烟

鐵盆嶂

泉向山坳出雲從足下起鳥啼烟露收人在空青裏

望太行

奉命祭告南嶽
途次新鄉道中作

望太行胡爲爾太行連縣幾千里中有鬱然深秀諸奇峯壁

立平岡插天起西北山多各具名論名未若太行羨此山獨
居太行顛惜哉何不從禪祀會聞鴈門雄勢宗恒山根底此
山成嶽峙此山近帝閭呼吸通元宰此山能出雲膚寸潤四
海吾家太行山之麓王屋析城鎮相屬緼緼冉冉萬山間馬
上徘徊空轉矚望太行亂心曲

敝廬在澤州大箕村偶得歸來復將西去愴然有感貽

別曉村恕堂兩弟

衛璠

太行深處一茅堂舊業年來欲就荒兩板門臨青石澗數椽
樓枕綠蘿岡煙霞有癖初停轡關隴無端又趣裝賴是同心
堪寄託憑君好爲課農桑

友山園

西嶺蜿蜒接太行巍然屹立俯山莊浮圖半向金翹隱蘭若

全從玉葉藏舒卷隨風紛變化淡濃釀雨漸鋪張朝來扶杖
凌丹巘不禁思親意渺茫

淙潺百丈暮朝聞激蘚縈沙派自分石齒拋珠疑注雨崖頭
掛玉認飛雲長垂曲塢滋華薄斜滙清池漾縠紋一枕羲皇
眠易覺灑流濺沫正繽紛

龍泉寺

田從典

古寺埋雲樹遙瞻堦影微溪喧珠迸落花爛錦重圍寂歷乾
坤小虛明色相歸諸天一迴步頓與世情違

輓李烈婦秦氏

朝梁莫晉人皆鄙然諾不侵惟烈士夷門監者燕先生引決
如歸報知已由來此事困鬚眉况是閨中兒女子長平李婦
何烈烈慷慨悲歌竟相似髮彼兩髦痛忽諸死則同穴長已

澤州府志 卷之四十一
矣白頭不共處士春紅顏盡墮夫人七摩挲霜刃甘如飴一
傳未殊心未已杞妻號泣摧齊城聶姊悲哀赴韓市廬江皆
誦仲卿詩上虞長記曹娥詠若使重編天祿傳指似幽光堪
比羨是日北風牛馬鳴慘慘日色下濛汜定知龍劍埋玉匣
夜犯斗牛光氣紫青苔白骨多古邱百川東逝不可止但令
造次得死所生氣凜凜照青史

陪尙子雲明府遊大雲寺

張鎰

雲戶分松色春山戀馬蹄市燈烟渚北樵響石橋西香梵從
風落疎星逐牖低明朝蘿徑外冰雪下寒谿

秋日遊石樓山

樊度中

爲有登高興秋晴古寺來林空夕照迴逕沒野花開澗水鳴
僧屋松濤下佛臺一樽橫暮景幽意獨徘徊

遊西溪二仙祠

韓國賓

岸柳巖花山色濃碧雲深處隱山踪流丹高閣教春住漱玉
飛泉借霧封松頂紫烟巢翡翠峰頭霽日插芙蓉淹留共把
清樽倒疑在蓬萊第幾重

余兩年督學晉邦車輪馬足踏徧西河今復啣命巡
視茲土汾雲沁水皆故人也新秋雨霽過長平驛宿
高都途次偶作書以誌懷
勵宗萬

馬蹄應識晉陽程驛吏循環管送迎憶昔有情尋舊句重來
無恙問諸生天空錦色雲鋪就沙際綃文水織成客路欲忘
秋到早柘桑陰裡嫩蟬聲

澤州道中次勵巡使韵

夏之芳

官程日夕傍山程翠嶂丹崖互送迎地軸千盤疑浪轟天衣

四合欲風生唐民止解桑田急儒吏曾聞鄉校成舉起襜帷
頻問訊可能不負誦絃聲

使院即事汪天泉先生韵

抖擻征塵衫袖潔心冰寒逼山陰雪撥開劈面馬頭雲萬壑
盤渦深處歇老屋蟬聯覆綠莎高槐古柏蔭交柯百忙何計
拋人海一隙南樓夜月多

遊寶應寺

李蟠陵川

偶登絕巘望神州寶氣浮空淡不收大敞山門舒老眼看山
無處不回頭

嶺上閒雲卧幾重雲閒我卧倩雲封高天露泥三更月人在
瑤華第一峰

迴車轍

姬鼎燕

共說臨河返高原轍轉深闕疑尊載籍望古洽登臨道在山
靈喜天開鬼力欽小儒徒夢想長有刻舟心

清涼龕

張擇中

天空秋色淨紅樹冷白雲過此清涼地人聲迥不聞汲泉煮
新茗石室談元文閑寂豈易得塵勞徒殷勤每歎不可及憑
空眺遠雲

小崦山下瞰石門

王旬

高秋眺遠空陡被東臯麓曲磴擁盤藤懸厓森古木濤從大
壑來水白石門出浩渺逝長川嗟我引深谷巉巖猿鶴棲淵
瀾蛟龍伏突兀聳神宮風雲簷際蓄身踞萬仞顛坐見飛流
瀑嘯歌聲遏雲俯仰襟懷穆

遊海會寺

衛貞

世人寬白法土木飭黃金不復悟無上空餘說甚深臺邊仍
虎氣松下亦龍吟寄語菩提子虛空如是心
幽絕難爲想吟成欲盡刪祇憐魚澹宕空羨鳥綿蠻路轉層
層水天開疊疊山瀝言勞童僕莫促老夫還

白龍崦

喬映伍

自古神龍地稜層石勢高出泉何湛湛畜雨欲滔滔廟貌生
人肅山靈愆物勞栢長天半碧歷落漲空濤

登析城山

王所善

名山類入眼此日一扶筇天外來孤鳥河干隱少峰力持星
海注勢領太行宗造極吾寧敢崎嶇躡後蹤

濩澤河

巉曉山下問真源抱郭迴流到石門細合清淵明素練驟連
黑嶺沒雲根奔厓觸岍濤聲急激瀨盤渦水氣昏倚杖夕陽
添逸興一竿斜釣想漁村

過海會禪院竟日留宿三首

項龍章

遠望疑無徑鐘聲出翠微山高雙塔迥寺僻萬峯圍爽閣風
頻薦沉林暑頓歸折腰慙俗吏初志雅相違
仄徑纔容足籃輿詰屈過凭欄丹樹合入坐白雲多叢篠抽
新籜渟泓映淺莎午鐘人吏散栩栩夢如何
碧潤簷端瀉青蘿木末垂蟬聲風斷續竹影日參差飛鳥凌
空疾歸雲入岫遲塵容方暫洗勿令鶴猿知

華嚴禪院

湯 惠

數折通幽徑尋僧古穴間到門方見寺入屋反無山久逐風
塵醉今知歲月閒秋光應念我許帶白雲還

過靈泉寺

田沆

長安飽世味佳境喜相過
層壇依雲近新篁納雨多
陰濃棲白鳥沙軟襯青莎
爲問荷鋤者田間事若何

盤亭寺

石渠

寺古遊踪少山荒蔓草遮
屏風還列嶂臺雨歇飛花
殿閉蛛羅結碑殘蚪篆斜
潺潺石上水空自遶恒沙

白龍嶺

張蘊生

龍藏不可測廟貌聳山隈
天意難回怒神功欲捍災
暗流疑作雨空響或驚雷
翠栢森森護陰風自往來

宿靈泉寺

陳國珍

古蹟巉巖策馬過化城仙
梵應鳴珂平原翠栢塞芳
杜深谷蒼松附女蘿
堦影常懸叅色相鐘聲初
度辨星河林間忽到

千峰月遙見桑林野外多

再過鷲峰禪院

王維珍

東峯精舍重徘徊杖底空濛
萬壑開下界人烟飛鳥外
諸天樓閣白雲隈藤蘿徑
峭巖扉古柿葉林深石路
迴撫景悠然成一嘆少時
遊妓記常來

盤亭寺

王曰翼

積翠凝嵐曉未收開門院落
頓深秋峯疑鷲嶺飛來住
澗似曹溪定後流
俱奉前朝書壘在活叅色
相水山留舊窻松壓南
宗老花雨荒苔月照頭

石堂洞

白方熙

巢枝步山顛亂樹迷歸路
石上青苔新始知昨夜雨

夜宿海會院

田澆

清涼龕
泉聲響不徹永夜繞虛亭可奈遠公性貪眠喚不醒

清涼龕

王璋

清涼六月勝拄杖陟諸天選境披青磴登高過碧顛潮聲翻
乳竇珠影弄山泉布地堪脩竹偃厓可結椽燒燈諸暗破槌
磬衆音堅鉢定聞龍伏牀平見虎眠林空仙梵響龕靜法幢
懸香飯然松屑齋蔬灌石田鳥鳴深岸柳犬吠隔籬烟狹路
新花綻平臺落果鮮宰官時說法居士欲逃禪證業叅前世
觀空悟幻緣卧行隨色相動靜識通圓叩鑰茫無我淘河信
大千歸途岐路迥遠岫積陰連法雨衣渾溼香泥屐盡穿蕭
疎情不厭淡宕興多偏久矣忘塵累陶然任往還

題都君錫隱居

李安時

情處深山物外身門前常是聚蹄輪已知谷口馳名久孰謂

清朝乏子真

道出陽城望玉屋山

完東氣

昔探王屋勝却憶杖藜初野老窺丹洞山靈護寶書雲生苔
壁暗松響石壇虛欲訪烟蘿子茫茫失舊廬

道中問俗

鄭洛

仗節觀風逐太行陵川遺俗自陶唐幾家茅舍千山暮一逕
烟蘿五月涼雲裏孤城藏市井雨中高嶺見耕桑民間生事
猶難問巖谷蒼茫思未央

題徐氏義居

自徐貴徐伋徐
璣以下凡七世

彭鸞

孕秀鐘靈本太行故家喬木倚雲長百年孝義騰三晉累世
衣冠萃一堂懿範追攀張氏轍高風遠播鄭公鄉他年太史
收遺事麟筆書題更有光

八景

李培秀

烟寺鐘聲時一聞忽驚晚照鬢華紋玉盃早泛熊山月石枕
高眠秦嶺雲芳草春溪難再得錦屏秋色欲平分不酬瀑布
靈泉飲臺上仙人也笑君

讀午亭先生喜見吟序而知我麋田翁也翁志行高混

跡儕俗而豪於詩性殊寡諧願得宿老鉅儒以為歸

以知者之難也公固喜見余乃喜聞遙和其吟

長洲韓 茨

身不挂朝市亦不匿林藪千秋澹蕩人乾坤落吾手游戲淮
王術鴻爪亦何有采藥與賣漿風流似此不

新詩太古音孤琴調綠綺撚藁納大瓢不忍投煙水嗟此欲

何之交臂如千里解后東陽車奚啻松風喜

昔日元真子煙波一釣徒隱顯俱無着訪象杏江湖四方與

下上我行安得俱願言圖行障相對阮與蘓李贊皇稱元真子隱而有名顯

而無事不窮不達嚴光之比翁似之矣末寓僕願見之意

婁東王 揆

古來清吟人往往在林藪寥落煙霞心縱橫採芝手孤寄足
自娛窮愁復何有借問擬志和家風似此否

標舉何必多風騷貴清綺麋田七字詩品味中冷水摘華不

採名雅尚託栗里斯人殊幽遐聞之已足喜

躬作以自給蕭然馬磨徒新篇脫口傳風流曠江湖依歸得

宗工聲與才華俱一編落人間貴若斟瓊蘇

濟南王士禎

西川郭曩易傳之籬桶叟古來賢達流混跡無不有抗懷寄

雲壑高歌動林藪聽雨鹿田人千載思尚友

崑山徐秉義

高人豁心胸八九雲夢藪寄跡塵肆間驪珠常在手聳肩動
幽吟衆妙無不有避世非避名問翁翁曰否

藻思抗顏謝冥情蹈園綺撰杖白雲巔濯足幽溪水長嘯揖
太邱傾倒高陽里公如李伯陽翁乃關合喜

我尋逸士傳千載誰為徒賣藥辭秦市織簾歸五湖芳躅渺
難卽高風今與俱安得拂衣去肆志同樵蘇

仁和湯右曾

遙想幽棲處閉門芳草新無勞逐貧賦自愛咏詩人入市跡
因寄綠雲心所親尚書最賞識晚進得王筠

半日村以詩代書答張麋田

東谷先生嘗稱門前芝草鹿麋田之句因遂字之

以麋

陳廷敬

朝謁得幽踪遠心展阡陌袖中一紙書清言想平昔門外麋
鹿田千載在咫尺芝草秀歲寒元氣肖翁闢蘿葛因風翻靈
根詎蕭槭已從自社招孰假元纁辟悠然人世寬不覺天地
窄念子如孤雲託以桑榆夕

東嶽廟賽神曲五首

樊度中

桑柘陰陰花罷開山坳金鼓震如雷過河買得平安紙都到
東皇廟裏來

南北村塢鼓更喧擡神取水乞豐年紛紛紅傘青旂影纔見
山邊又水邊

高禩祠在殿西垣簇簇行來盡女鬟誰信神功真浩大一時
香火似鰲山

春風駘蕩滿春衣亭午招尋出翠微喚得名姬何地醉艸青
青外荻簾圍

臺上弋陽唱晚晴臺前百戲開童嬰博郎鼓子琉璃笛山路
東風處處聲

宿榭山寺

何陳宮

暫舍籃輿趁晚晴羣峰環轉似逢迎好憑今夜山中月照盡
民間疾苦情

經端氏

立馬干山上揚鞭屈曲行三分留弱祚百雉見頽城桑棗榘
先落苗寒穗未成眼前盡疾苦何以慰蒼生

沁水道中

王衡

石徑繞寒山秋風在溪水前村幾處烟没入朝雲裏

過大嶺

樊初荀

山饒十里險坂可九迴紆石老斑于虎燒殘黑失烏古祠開
寂歷細路入荒蕪小憇還相促前途戒日曛

龍泉寺

龍泉巖上寺杏谷日邊霞夜瀑晴巒雨春燈白雪花時正月
中旬大
雪
磬浮松月小關掩嶺雲賒仄徑穿林細輕烟拂樹斜東風
遲暗艸暝色滯飛鴉慧遠溪前路樵蘇數十家

自土沃山路入張馬

又是山間一日程南來信宿轉西行風吹嶺樹雲開合禾盡
溪田路縱橫短碣何年惟頌德孤村幾處未知名回頭遠過
幢山背爐冶牛車別有聲

咏兒歸鳥

田懋

熟種何由種得成兒歸空自了殘生只今也悔當年錯腸斷
西風夜半鳴

乙卯長至前四日濩澤夫雪用坡公聚星堂韻仍禁體
物語呈郡伯

王照雪子

浪卷風翻雪葉葉太行王屋千峰雪試上高樓一臨眺定教
狂喜稱奇絕昨宵痛飲百瓊空犯曉貪看雙齒折林光照耀
鴉鵲喧岫色蒼茫狐兔滅檐冰忽墮聲脆清凍筆難呵書顛
掣須臾月霽龍公回倏忽霞開天女纈析城太守擅風流斗
帳羊羔渾不屑去歲祈神雪滿山今年送瑞花盈簷亂村荒
瘠貧苦多祗望豐收無別說仁心善政感必通欲播聲詩誰
點鐵

長平箭鏃行

周京穆門

長平箭鏃長一寸三角觚稜枯鋒鈍銅花上澁磨不光猶是
當年血腥暈我思秦既殺人不用兵商鞅阡陌蒙恬城戰功
特數殲趙卒四十萬人同一坑嗟乎白起殺降亦不勇解甲
拋戈在樊籠詐使易欺括小兒一劍仍教杜郵捧至今患氣
狸雲昏精靈哭野夜叩門村民頂禮髑髏骨飲食祭祀安寃
魂里人取其骨之大者髒之安寃寃省寃谷口鴿鷓聲池魚
未許遭煎烹廟前一池有魚人不敢取大者秦歎趙歎空紛
紜千年箭頭猶留齧過客黯慘徒酸聞可憐誰說廉將軍時廉
頗特堅壁以老秦師起詐
使趙令括代頗以覆之

鐵花行

試燈時候繁新火簇著冠兒鬪花朵星流電掣須臾間閃睜
晶毬滿街墮未聞鼓鑄融洪鑪燒鉛鍊汞精金鋪青黃反覆

視人面火候一足爭喧呼近爐火視人面青者熟黃者足紅過即不成花健者袒跣

搏丹砂橫飛十丈開明霞凌雲高樹觸星點紛紛散落蒼雷

花千花萬花半空起天女乘鸞啟玉齒盡掃瑤臺絳闕雲打

魄成團作歡喜我聞下策用火攻看爾勇猛肩胛紅幻弄奇

伎供一笑捲地疾走驚兒童

遊碧落寺用太守原韻

象外諸峰幾萬重一聲清磬落芙蓉影低雲擁龕前佛寒起

風搖殿角松春到上方烟歷歷水分下界響淙淙摩崖灰劫

千年火誰與安禪咒毒龍寺有摩崖碑唐李諤為母妃作佛事今燬

雪中走潞澤雜詩選四

四山積雪玉玲瓏霽色遙看半遠空捲地寒風忽吹散夕陽

影裡白濛濛

太行山勢渺層臺雪亂羣峰曙色開不畏虎亭留虎跡要看

王屋析城來

此谷由來號省冤傷心斜日響哀湍髑髏尚鏤當年鏃持向

人前不要看

牛鐸聲先破曉霜蚤行人怯冷初陽輸他待漏明光殿薰暖

朝衣侍女香

遊小析山

范大中禹州

何年鵝鸛列軍營此日猶傳司馬名小析山從司馬分下山石威稜餘

戰氣秋風蔓草野烟平

析山分處塔光明寺外陂陀側嶺橫形勢蜿蜒飛不斷崇岡

遙接卧牛城

歷歷川原野色寬秋田早刈綠雪殘遙看隴畔人歸去樹外

斜陽帶暮寒

琵琶泓

袁鉞

道是阮生物涵虛映太清湍流非鐵撥激響和銀箏抱月澄
中夜迴風照晚晴無絃聲細細有曲水盈盈激灑青衫溼玻
黎紅袖擎鮫人知海晏國腹弄仙聲

橫望鎮登太行絕頂

朱樟

旗亭高望鬱蒼蒼陡覺飛身躡太行岳勢峻嶒懸北斗霸圖
挨托啟南陽轅回上黨摧車路地坼中原逐鹿場反顧豈無
親舍在吳雲曳練轉微茫

掌上山河勢盡浮平田疎豁望中收一灣清濟通王屋四面
春巒壓孟州趙北燕南資割據朝梁暮晉總仇讐憑欄欲吐
英雄氣棋局空談莞笑休

瑤臺笙鶴杳難聞竹樹叢叢翠不群左界星辰天外轉千家
砧杵水源分斜陽低照花間雨少室遙飛畫裡雲鷄犬亦知
人境遠但來絕頂豁塵氛

裊盡羊腸嘆險艱黃河依舊白雲間水壺貯月來枋口

見元人姜

正枋石徑窮蛇下軹關丹嶂乍開唯見水青林中斷忽無山
留仙亦嘆嵇生嬾只約樵丁數往還

天井關謁迴車廟

路從井底盤天高可仰企謂停宣聖車轍痕猶印地誰與安
流傳恐以儒為戲豐碑揭道傍分疏補疑事我聞賢人誅

鳴犢舜華

君子惡傷類已迴未濟轅何由入幽隧鳳皇翔陝鄉鳴

琴託高致關吏為余言靈跡莫拘泥周遷晉是依遠風豈無
自用晉如用周西行寔經始未過神所存奚必待身至摠衣

澤州府志 卷之四十八
瞻廟堂顏閔左右侍釋菜薦溪毛河圖設宗器重尋馬蹄穴
未敢年月記惜無千尺松涼樾蔭深翠元遺山天井關詩巖
山頭千尺孤松樹
關一夫守升險敢憑恃受學來青衿耕耨先禮義追論戰伐
初嗚呼嘆五季

莒山題藺相如廟

地名全
玉嶺

一失連城間道行前川明月接蒲津毋勞血濺已歸趙不待
鷄鳴早脫秦瑤草暗迷完璧路好山猶對負荆人米山廉頗
故蹟亦在
望中叢堂燈火却鄆瑟不及茲鄉禱祀頻

小山納涼

選二首

誰云太上可忘情十二闌干襯碧城山疊夏雲催夏雨水磨
秋澗割秋聲紅殘仄徑迷香霧青入遙峯送晚晴清簾疎簾
殊不惡醉鄉無利亦無名

寫望殊多物外情小詩敢擬謝宣城園林處處多佳日絲竹

泠泠無此聲石塢斜收烟際色水籬閒放夕陽晴茲遊肯被

東坡笑春酒能藏社瓮名

無數小山藏社
瓮東坡桂醕詩

米山

趙廉頗聚米
抗秦軍處

城下何勞庚癸呼

米山鎮
有城

不妨聚米繪山圖居人莫笑三遺

矢曾問將軍善飯無

高平書事

絲穿驛路遠平岡高阜參差半夕陽箭鏃含冤薶殺谷

省冤
谷舊

名殺戰壕留鬼咲輸塲

周世宗破
于此地名
劉景

帘飄澹白梨花釀門

掩深紅柿葉霜籬外幾番嗥絡緯不知織女爲誰忙

長平箭頭歌同穆門

太白星流任食昴邯鄲軍餓廉頗老谷口悲風送冷雲不許

東方發紅炤淥衫小吏倚驛門箭頭拾自王報邨土花暈碧

古血死剩此寸鏞鳴秋冤鈍簇三稜露飽脊挾詐殺降誰畫

策見史記鄒陽傳毒雨崩城戰壘隳猶見沙壩未薶骼甲寅秋高平

角尚見遺骨頭顱大者為鬼雄國殤塋祭春旂紅左更已齒杜郵

劍豈得留住咸陽中過客吟詩弔殘鏃怕向西郊買簦竹猛

焰難銷秀鋌山秀鋌見昌谷集鄭司農云鋌箭足入箚中者凶鋒蚤脫魴魚籠丹

林一水涓涓流上黨鬼哭韓陘愁四十萬人同穴葬蒿塢剪

草迷青止莫艱箭頭腥莫洒長平涕坑趙坑秦同一例償爾

新安一半魂復仇喜得虞姬壻

榭山游大雲寺題天外樓

瀟灑秋容接玉溪溪在端氏見元遺山詩飛樓咫尺與雲齊三凹磴道

欺苔滑一桁闌干壓翠低月冷僧牕看虎鬪雪消煙塢隱猿

號禪房却寄青蘿上踏遍松陰到寺西

禪心無著木來空木末秋雲寸寸同頓覺此身游物外不安

一事累胸中葢吟細韻松梢雨雁警新寒榭葉風欲借僧毡

勤坐卧下方燈火隔谿紅上人留宿樓上

鐵花行

羊頭山鋼飛春黍粒破釜夜鳴坤母泣鐵花例用釜毀礦穴分苗照

上元冶師煉魄當壚立懸牌報熟十二時石炭氣銳烝紅遲

羯鼓停催花未發土銚排寒蟲不知一火人面青二火人面

白面面相看醉纈生潑地熟紅妝不得銀瓮翻漿玉杓分樹

頭結綻芙蓉色轉眼狂花漆客慧絲餅穿天補闕事解衣忙

躍潑寒胡簇蝶驚傳撒珠戲箭壺一擲電睽張顛倒落花如

雨墜暗塵馬過鑣頻開爛額客呼星退避譙樓鼓吏報二更

海綃四照天為青阿奴投燭出下策試問汝曹見未曾吾鄉
 苦于祝融厄悲酸乍起搖心旄赤蛇吐舌不停掉王夫丁女
 何無情麥田吐秀杏園圻所見陰火同青熒南麥及銀杏夜
花皆小于此
 世間快事那踰此醜樹得暖留冬榮樹得鐵花來
歲張王更甚湘君簾外
 春雲連唾落香絨黏紫鳳他年重現散萼身寶焰龍宮記初
 夢

游碧落寺

雲卧山門隔幾重半天吹落碧芙蓉五龕各供低眉佛三鬘
 親摩露頂松鳥未啼時秋寂寂水分流處石淙淙頻敲晚磬
 新齋散將敲碧落新
齋磬項斯詩掃壁何由看畫龍畫龍猶掉尾飛去殿
西頭陳相國文貞游
寺詩落句今
西壁已廢

題石勒冢

在陵川崇安寺門
左郝文忠有詩

難與高光步後塵但留尸冢未全湮洛陽不遇青眸客誰識
 東門倚嘯人

襄國魂飛葬此川離離衰草蔓秋烟漚麻池外人應笑地下
 人曾厭老拳陵川民以
種麻為業

身前身後禍無端狐塚獾蹊嘯夜寒未必不疑人發掘只將
 鬼蜮矚曹瞞

酌酒難招羯部魂英雄群起盜中原佛鈴聽徹應微悟合與
 山僧守寺門反郝文
忠落句

鳳皇窰

在陵川
東南境

何年構此鳳皇窰那許人吹弄玉簫毒草經秋濡虎尾斷崖
 分路轉鶯腰鶯腰村名入
河南脩武吟寒蟬歇後桐初落好鳥啼殘雪未
 消地冷只疑丹穴杳肯容斥鷃笑扶搖

郡人元夕屠火于門謂之人火有塑朝官執笏者貯石炭于中經宿不滅此吾鄉所無事同穆門賦

家家欄檻爛星辰暖眼何曾起暗塵丞相嗔來能炙手鄧侯火迫已班春官街到處藏温戶陋巷于今少曲身暖得曲身成直身見

孟東野點雪爐邊消內熱不嫌太守獨清貧唐史源休導朱泚僭號姚合言

勸園奉天二人自比蕭何人皆笑為火迫鄧侯火迫急忙之謂咏半翅徐青簾謂之半癡半于雉而脆美上谷人與黃鼠竝稱以癡而易襲得名與穆門同賦

窮鳥堪充席上珍窮鳥見家竹垞咏半翅詩總于凍雀許為隣飽聞嚴瀨非癡語子陵云卿言不痴此非痴語也出高士傳誰信襄陽有半人用王乍壓紅

糟冬味美得兼黃鼠歲盤新偏容爾輩多憨急觸網頻收自在身爾雅鷓鴣鳥冠雉為鳥憨急

下孔村陽城縣東

垂楊陰裡鳥聲歡山裊榛菅徑曲盤雨刷上流春水瀉石圍高岸黍田寬碧闌干外梨花重白粉墻低繭紙乾村以造楮為業行盡太行三月路木縣裘軟客衣單

重過碧落寺訪韓太尉子李諤摩崖碑不得因題寺壁同穆門太尉唐太宗子高宗時刺澤州

來窮碧落訪松雲玉筍碑從絳郡分韓王先刺澤州後移絳州碧落碑先刻于絳用王筍空羨王孫能遇妣母房太妃為房相立齒女伊子勒碑為母祝釐徒令仙客想

書裙穆門以不得見碑為悵累日鏞龕已蝕重摩字碑燬于火楮本難尋舊拓文萬曆時居民尚有紙本存者安得眉山歸畫版佛前長斲女香薰

端氏城懷古

言尋鹿路轉林腰端氏鎮屬鹿路北里深喜居民未寂寥百折細泉收

嫩堰一犁寒雨立疎苗山遮嶺北峯尤峻路通老馬嶺水曝邨南
勢漸驕沁水過端氏始大城郭已非分晉舊韓趙魏三分遷晉君于端氏教人何

處問椒聊

西郊謝雨見禾黍暢茂曉山如拭用范清江先秋喜雨

韻

及晨攬衣起涼味侵齋牀卷旆適西郊朝煙破鴻荒叢祠隔
陀脊僉謀祈謝方始見禾黍茂助長踰尋常潭深揭幽邃珠
額開龍堂羣峰淨如拭路曷阡陌長農餘商圃事蟲吟蔬葉
黃幸際膏沐施籬落同江鄉溪迴往來渡濃露霑我裳翹首
記朱夏擊鼓催移秧寸香荅田祖樂此年降康

自曲梁掌入審嶺口問濟源分界處

界碑離立兩相望嶺底聯綿度鬱鬱岡過客乍看知刺促刺促見審

岳閣道謠謂不開懷也居人久住亦淒涼崩崖雨漏通鷄棧土人以樹枝接路為棧

殺草霜濃踐鹿迹尋到深山更深處但愁飛劍倚天長

登九女臺宿道院

不知九女是何神羅襪凌波畫裡身花飈釵梁銀一角隔河
先到浣衣人

中心一道沁河流孤鶴橫空水面浮照出水仙梳裹罷短枝
斜襯玉搔頭

洞戶眠雲藏水巖仙壇咒雨沸潛虬昨宵夢醒微吟處閃閃
秋燈紅葉樓

望王屋寄周穆門

皓鶴歸來僊境寒人言西頂即天壇碧雲遮却凡夫跟何止
中峰欲上難白香山詩王屋中峰欲上難

細剪霞綃製玉裙千崖萬壑苦難分欲收願果知何歲只合
勤隨華蓋君晚歲何功收願果見杜少陵天壇詩
未能別婦訪茅君縱有仙歌那得聞留取壇邊一枝竹年年
爲客掃秋雲

孤山邨時議築墩臺置防汎

邨踞萬山中得地頗險迥蒼龍鬪角牙一峰獨妍整斗削青
芙蓉玲瓏綴花影懸崖竦而尊欲滅太行頂居毗無十椽兩
灑籬落淨兒躡椽栝收婦告米鹽罄鑪錘從冶師所恃鑿幽
礦憶昔神宗朝開採播稅政老穴豪戶專據寨一夫逞蔓毒
先渠魁掉臂肆狂獷篝火煽狐梟荆榛路小梗嶠負敢誰何
櫟擊抱虛警姦偷雖漸除禍弭實天幸赭樹封泥坑沙磔塞
廢阱我行荒山中四顧毛髮凜時平散群小風止樹欲靜習

聞坎窞卽利用苛政猛防秋卓成旗號火隔西嶺嚴如鷹謹
緜健若弓受檠消亂及未萌導窾乃肯紫歸塗葉正紅下接紅葉
溝靈楓送谿冷追筭捕盜年看碑發深省村有捕礦賊碑

芹池

冰岸遙砧隔澗聽亂山平處見旗亭潺潺不斷寒谿鎖石面
菖蒲帶雪青

難與居民說亂亾點燈一賊下平陽若非耕出沉沙鐵誰信
芹池是戰場明末流寇點燈子與官軍大戰于芹池

過太行忠義砦尋岳武穆故壘用查初白朱仙鎮韻

燕陘南垂趙北際疊嶂層巒供拭眦忍見青城二帝行排擊
兩河斜善類星分砦柵棋布營太行之社稱忠義喊山遙應
岳家軍不比當車奮螳臂雪耻嗤還朽木檠頂恩剩此香盆

地若上頂香盆儲沁水城西土巋然斷垣屈曲長蛇勢戴天

不復父兄讐摩壘空談宣靖事義旗絡繹號令行傳檄中原

定何易徒令居士夢華胥南渡偏安擁虛器我來覽古弔豪

傑蒼茫未測皇天意誰驅一檜賊中來淪喪兩京主和議賊

眉私語誤東牕銀餅井底冤三字丹坪水冷白華凋丹坪白華皆忠

義結煙痕流盡英雄淚守門石爛於菟蹲若上止存滅竈灰

寒墻角棄若上有山前不見岳侯祠雪灑孤松滴寒翠若下

甚奇閱盡滄桑又幾年斫地悲歌吐英氣

夫妻嶺

邪軒力盡此山巔難記夫妻過嶺年六月行人愁燥吻不知

崖底韞甘泉嶺下一泉甚甘予六月曾飲之絕佳

老樹鳴冬剩葉黃寒排寸指見餘僵峯腰路轉人煙少白日

敲門避虎荒

食柿用東坡食檳榔韻

高林火傘張冷雨潤古礎惜哉墮地遲悔時失當暑溼澤多

窮岷畜昔冬可禦下垂頰虬珠小品烏特乳即牛入口澀味

消淋水當烘煮生柿置器中自然紅熟其甘如蜜嗟我脾病

人對此色先阻恐遭漆葉敗擣舌不暇吐涼沁九月霜郡人

柿性變炎上苦芳蒂織吳綾紅袖誇媚嫵白香山杭州詩紅

買市不論錢褒拂笑良賈劉屏山柿子詩火亟箋神農經主

治說溫補見本草震澹似無功澹即痰用漢健胃亦姑許兒

女廢饕殮含飴腹堪鼓危柯鳥不巢佳蔭莫予侮談禪分半

葉用瀉妍煖日卓午離離絳蠟懸缺禿可細數釀作醍醐清

酒力猶敢努看書大白浮邑人釀柿酒味甚佳其色白覆杯屢揚舉冲澌

無間斷用昌黎詩眼暈忘瑣旅不藉麴米春雋味天所與柿酒例不雜米
黍天然自成吾衰喜初嘗時助晉人語

澤郡元旦家設門火即官府署亦同其木用桑夫伐松
代明古人惜之矧桑為飼蠶之樹取而薪之旦旦而
伐其何以繼乎用東坡夜燒松明火韻以示郡人冀
敝俗之速改焉

月額厝新火照耀夜不寒絕似絳帕吏燒香迎紅鸞机盆圍
樹根釀和春一團恐被元緒笑伐汝同芳蘭維桑合恭敬樓
葉青如槃懿筐主蠶職豈忍斨斧殘此鄉尚繭絲能母發永
嘆俗薄宜改而喜氣生門闌

到盤亭山止宿于峯寺

九曲屏風疊瑤簪擁髻青送春猶有雪問水已無亭漸入少

人境徒聞初地靈新齋清磬罷僧老倦談經

字失殘唐勅苗存免稅名劫來垂佛淚時過忌鐘鳴鐘卧寺外僧云

山為虎頭形鳴鐘則寺至不利澹月移香霧梨花賞夜晴來朝應喚渡隔水

一僧行

析城

三過盤亭谿縈回抵源麓穿林尋禹蹟氣象反局促勇往策
驂蹕蹉跌棄檣柁刻畫狀崇墉天體混沌鑿羣山外包羅森
立萬喬木哈呀張北戶瘦石待鬼哭地名北邱頭坪面敞坡陀脊

背互起伏到此心逾清湛寂了無慾春林笋後生覓徑問小

竹水經注語蒙茸感髮晞滅頂笑頭禿扶眼得二泉弄色湛寒淥

救旱容偷湫見東坡詩注方言取龍水謂之偷湫地注瓶罐足坡詩餅罐寧邀

密咒僧石子細淘漉見輟耕錄幢幡飛電葉穉稭報秋熟美哉腍

砥勞功鉅矢褒錄行宮坐成湯冕旒振虛肅摩挲洪武碑苔
剔始立讀流傳禱桑林責已事凡六使君非逸游望歲然晝
燭未暇薦溪毛釘豆先采菽入夏庶草蕃辨候判炎燠一竇
啟南訛磨麤潛斥逐回鑣敢憚煩歸騎恐欲速緬想太古初
山川盡醇樸

聖王坪

簫鼓祈年及萬家瀘泉新汲古城窪仙人待雨呼龍草

寰宇記山

頂湯王池四岸生龍鬚草

少女留香弄粉花

坪產胭脂粉花一枝五色天下所無

未買春田

培百藥難搜靈氣孕三椹何時許訪煙蘿子移屐重尋罨畫

沙罨畫沙見范石湖詩

水頭村

潺潺春碧去無痕曲沂花源玉帶村何處重尋碓下客一間

茅屋俯溪門

鐵盆嶂

後唐洪密禪師入定處

栗玉削斗崖厥勢狀排闥晨光截陰嵐細路曩木末嶂劃仙
掌平迴峯露轆轤戶人不知到面天宇豁阿師結夏初寸
土誰所割趺坐踰六時煙雲現活潑峭碧皆摩空無地寄栢
枯蘿龕嵌空青花瓣吐銅鉢凹鑄震仰孟謙受一囊括設無
涓涓泉何止僧徒渴瀑絲不住飛分口潤檀越不減亦不增
出門悟解脫村西排杵白瀘粉澄野葛濟勝已忘疲何愁馬
顛跋

海會寺懋松風水月堂

手翻梵夾認前脩灑灑春泉繞寺流細筍未生高閣外好風
先待小池頭階憐碧草裙腰綻花照紅魚鏡裏游鴈蕩曾勞

澤州府志 卷之四
山水夢恍如身到大龍湫

寺泉一名龍湫

望太行

朱曉

太行西望息車塵，犯曉看山翠黛分。
一餉微風吹不動，恍如天半落晴雲。

逸翠遙橫飄緲間，色飛萬丈少躋攀。
逸翠飛萬丈見郝伯常望太行詩無端一入山中路，石磴盤回不見山。

登太行絕頂

太行邈迤來雲中，繚繞千里青無窮。
峯巒高下不一數，懸崖絕壑凌河東。
昔日何由名上黨，山高可與天比崇。
今我整翮登其巔，昂目一望身憑空。
奇石煅煉補天漏，飛雲團結遭鴻蒙。
峽嵒屹嶮天下脊，神威引觸吹剛風。
哀青貯碧自凝染，氣候變幻呈山容。
俯視羣山徒拱捧，盤中餽飭堆玲瓏。
境外日

影展平曠三郡隱，現林叢叢

河北三郡黃流一線落天半秋環繞山下

晴不霽，垂長虹，睇視良久心欲墜。
頓覺大地開樊籠，欽岑參錯天地設。
氤氳靈氣彌蒼穹，以兵爲阻險爲守。
誰料以此與兵戎，安得圻壤靜無事。
攘臂移去非愚公。

登榼山天外樓

峯壯形如榼，山因以榼名。
樓高能避世，心曠暫忘情。
遠岫來青色，斜陽送晚晴。
憑闌曾久立，頓覺一身輕。
謾道來天外，乘空得此樓。
盤山松樹密，遶寺白雲浮。
樓下有白雲洞異境忽可接，纖塵無復留。
蓬心如有悟，身世託遨遊。

碧落寺

門山迥勢崔嵬碧，落雲移梵宇。
開一帶寒松迎，寺立半天清。
響挾風來摩崖無處尋，遺蹟繡佛當年剩。
劫灰重念黃公

澤州府志 卷之四十一
釐祝地令人深愧謁香臺

詩餘

梅花引 過天門關作

金趙秉文

山如峽天如席石顛樹老冰崖拆雪霏霏水洄洄先生此道
胡為乎來哉石頭路滑馬蹄蹶昂頭貪看山奇絕短童隨
皺雙眉休說清寒形容想更饑

西江月 觀瀑水簾

明陳棻

鐵壁翠雲堆裏懸崖細路縈迴丹河轉處境天開玄圃瓊田
堪愛玉鳳九苞倒下銀河幾派低垂樓臺回首莫言歸落
日鐘聲雲外

喫酒兒 喫酒兒鳥聲也故山多有余於薊門道中偶聞之遂成二闕

國朝白孕謙

喫酒兒細叮嚀酒杯到手不須停眼前有酒不盡醉枉向醒
時林下聽

喫酒兒喚路衢酒旗招處盡情沽客舍三更眠未穩枝間啼
鳥笑人愚

菩薩蠻 早發星輶驛是太行山絕頂處

顧貞觀

山城半夜催金柝酒醒孤館燈花落牕白一聲鷄枕函聞馬
嘶門前烏桤樹霜月迷行處遙憶獨眠人曉寒驚夢頻

南鄉子 渡扁舟

項龍章

水綠漲山根沙岸千家薜荔村斷橋茅屋東西路紛紛野航
恰受兩三人迢迢入深林雨過山城見月新殘陽古道啼
鳥起陰陰墊渡無人舟自橫

酷相思 靈泉松月

莫道荒山冷無主有萬個松堪數况夜夜月明來照汝月色也松多處松色也泉多處山寺日斜風滿樹鳥弄酸如雨晚樵歸唱响雲邊路月去也泉圍住泉去也松圍住

補遺

春秋齊伐晉入孟門登太行封少水

戰國長平之圍趙請粟於齊齊王弗許周子曰夫趙之與齊楚猶齒之與唇也唇亡則齒寒今日亡趙則明日患及齊楚矣救趙之務宜若奉漏甕沃焦釜然且救趙高義也却秦顯名也不此務而愛粟爲國計者過矣弗聽趙收天下以伐齊蘓厲爲齊說趙王曰秦盡韓魏之上黨則地與國都邦屬而壤挈者七百里秦以三軍強弩坐羊腸之上卽地去邯鄲二千里且秦以三軍攻王之上黨而危其北則勾注之西非王之有也

秦初分天下爲三十六郡上黨居其一置材官趙王武臣用張耳陳餘計收燕趙以自廣使張騫畧上黨秦皇帝東

游登之罟刻石遂之瑯琊道上黨入

蕪代曰龍賈之戰魏襄王五年岸門之戰韓宣惠王十七年封陵之戰魏哀

王十高商之戰此戰事不見趙莊之戰趙肅侯二年秦之所殺三晉之

民數百萬今其生者皆死秦之孤也西河之外上雒之地三

川晉國之禍三晉之半秦禍如此其大也戰國策

漢韓信定魏地置上黨郡高祖與項羽相拒拜任敖為上

黨守據形勢代相陳豨反攻上黨任敖堅守封為廣阿侯

大司農耿壽昌請糴三輔弘農河東上黨太原郡穀供京

師馮奉世子孫石長安及中山太后被誣家族死者十七

人仍徙宗族還上黨司隸校尉鮑宣劾董賢以直聞進何

武彭宣拜司隸丞相孔光官屬違制行馳道中宣鈎正摧辱

事下捕從事宣閉門不肯納坐距閉使者大不敬下廷尉獄

太學生舉幡集救得減死髡徙上黨子孫遂家焉更始

遣尚書僕射鮑永安集河東以馮衍為將軍屯太原與上黨

守田邑繕甲養士扞衛并土建武二十四年匈奴寇上黨

晉劉淵稱大單于遣劉曜陷太原屯留長子及泣氏高都

劉琨至上黨見兵寇殘毀之後生理蕭條又以并土為九州

之險精騎所出不可不賑請粟絹綿俱以五十萬計從之

石勒為苟晞所敗將奔劉淵聞北部大張匄督擁眾數千壁

上黨往從相昵因說督曰兵貴有所屬今劉單于懸賞招亡

部落皆議去部大張而歸單于願早自為計督無謀恐眾一

旦叛去遂與勒俱歸淵淵以勒為護漢將軍平晉王

元魏割上黨襄垣縣為襄垣郡割高都縣為高都郡割泣氏

縣為長平郡

北周以上黨羊頭山黍依漢律曆志累黍造尺以定黃鐘
北魏世祖神麤二年春二月上黨李禹聚眾殺太守自稱無
上王署置將帥河內守將擊破之禹亡走入山為人執送斬
之 太平真君六年春二月世祖西幸上黨觀連理樹於洺
氏 中興二年前廢帝安東將軍辛永右將軍建州大都督
張悅舉城降 泰常七年冬十月司空奚斤伐滑臺不克太
宗怒議親南討壬辰車駕南巡出自天門關踰恒嶺四方蕃
附大人各率所部從者五萬餘人南宋東郡太守王景度棄
滑臺走八年夏四月至洛陽觀石經蠻王梅安率渠帥數千
人來貢方物閏月己未還幸河內北登太行幸高都辛酉至
晉陽

隋文帝時盧賁為懷州刺史決沁水東注名曰利人渠又派

入温縣名曰温潤渠以溉烏鹹人賴其利 大業中文帝幸

榆林郡還至太原謂張衡曰朕欲過公宅可為朕作主人也

衡馳至河內與宗族具牛酒文帝上太行開直道九十里以

抵其宅 大業二年牛弘進位大將軍三年從拜恒岳壇場

珪幣壇時牲牢並弘所定還下太行煬帝嘗引八內帳對皇

后賜以同席飲食其禮遇親重如此 會昌三年成德軍節

唐廣德二年郭子儀兼河東副元帥 度使王元逵為北面招討澤潞使魏博節度使何弘敬為東

面招討澤潞使是年七月免河東秋稅 會昌四年八月昭

義軍將郭才殺劉稹以降戊戌給復澤潞邢洛磁五州一歲

孝童楊牢河南人父茂卿從田氏府趙軍反殺田氏茂卿

死牢往索父喪自洛陽走常山二千里號伏叛壘委髮羸骸

澤州府志 卷之四十九
有可憐狀讎意感解以尸還之單縗冬月往來太行間凍膚
皸痲銜哀雨血行路見之並為嗟歎 長慶中河朔復亂合
諸道兵出遷延無功賊取弓高絕糧道深州圍急白居易上
言兵多則難用將衆則不一宜詔魏博澤潞定滄四節度令
各守境以省度支貲餉每道各出銳兵三千使李光顏將之
會昌中崔碣為拾遺武宗方討澤潞碣建請納劉稹降忤
旨貶鄧城令 武宗方伐劉稹慮河朔列鎮陰相締以撓兵
事李德裕薦李回持節往諭何弘敬王元逵以澤潞邇京洛
非若河北三鎮國家許世以壤地傳子孫者且稹父子無功
悖誼理上以邢洺磁三州與河北比境用軍莫便魏鎮且王
師不欲輕出山東請公等取三州報天子二將聽命 盧從
史其先在元魏時為盛族後徙籍不常少好騎射遊澤潞間

節度使李長榮署為督將貞元後藩臣缺德宗必取本軍所
喜戴者授之從史在潞姦獍得志又善附迎中人會長榮卒
卽擢拜昭義節度副大使元和中丁父艱去官從史卽獻計
誅王承宗陰向帝旨由是奪服領澤潞 楊炎既誣殺劉晏
朝野側目李正已表請晏罪炎懼乃遣腹心孫成使澤潞磁
邢幽州並分走諸道聲言宣慰而實自解辨其狡獍如是
李吉甫奏復宥州治經略軍以隸綏銀道取鄜城神策兵九
千實之以江淮甲三十萬給太原澤潞軍增太原馬千匹由
是戎備完輯 憲宗時李絳為華州刺史州有捕鷄戶歲責
貢限絳上言勸止畋獵有詔澤潞太原天威府並罷之 李
抱真卒馮伉持節臨弔歸之帛不受又致京師伉上表固拒
於是醴泉令缺宰相高選德宗曰前使澤潞不受幣者其人

清可用也遂以授伉 元和初澤潞盧從史詐傲寢不制其
父虔卒京師而成德王承宗父死求襲權德輿諫以爲欲變
山東先擇昭義之帥從史拔自軍校偃蹇不法今可因其喪
選守臣代之成德習俗旣久當制以漸許成德之請則可許
昭義則不可後皆如所料 長慶中劉從諫守澤潞何進滔
據魏博並驕蹇不循法度澤潞劉從諫表歐陽柅在幕府
元和中劉稹拒命詔諸鎮兵討之杜牧移書於李德裕以河
陽西北去天井關疆百里用萬人爲壘窒其口深壁勿與戰
成德軍世與昭義爲敵王元逵思一雪以自奮然不能長驅
徑擣上黨其必取者在西面今若以忠武武寧兩軍益青州
精甲五千宣潤弩手二千道絳而入不數月必覆賊巢山西
兵單少可乘虛襲取兵聞拙速未賂巧之久也俄而澤潞平

略如牧策 王承宗擅襲節度時澤潞盧從史詭獻征討計
裴洎固爭以爲從史苞逆節內連承宗外請興師以圖身利
且武俊有功於國陛下前以地授李師道而今欲奪承宗地
有之賞罰不一沮勸廢矣憲宗依違不能決卒用吐突承璀
謀會兵討承宗從史果反 帝貫之爲伊闕渭南尉澤潞郗
士美以厚幣召之不應 會昌中澤潞劉從諫死其從子榘
擅留事以邀節度李德裕建言澤潞內地非河朔比昔皆儒
術大臣守之李抱真始鎮昭義軍最有功德宗尚不許其子
繼及劉悟死敬宗方怠於政遂以符節付從諫太和時擅兵
長子陰連鄭注李訓外託效忠請除君側便以兵屬榘且榘
所恃以唇齒者河朔如令魏鎮不與則破矣夫三鎮世嗣列
聖許之請使近臣明告以澤潞命帥不得視三鎮今欲誅榘

令三鎮各以兵會武宗然之乃以李回持節諭王元逵何弘
敬皆聽命始議用兵討劉愼 會昌中王師討澤潞李德裕
建請詔書付宰司乃下監軍不得干軍要率兵百人取一以
爲衛自是號令明壹將乃有功 德宗出奉天李抱真將還
澤潞田悅說王武俊朱滔踵襲之 張谷納邯鄲人李巖女
爲侍人號新聲當劉從諫潛圖窺脅新聲諫谷曰始天子以
從諫爲節度非有戰野攻城之功直以其父挈齊十二州還
天子去就間未能奪其嗣耳自有澤潞未聞以一縷一蹄爲
天子壽左右皆無賴章武朝數鎮顛覆皆雄才傑器尚不能
回天子恩况從諫擢自兒女手中苟不以法得亦宜以不法
終君當脫族西去大丈夫勿顧一飯恩以骨肉腥健兒食言
訖悲涕谷不決者三月畏言泄繼之 代宗時回紇遣使上

書請助天子討史朝義欲入蒲關徑沙苑而東藥子昂說曰
自寇亂來州縣殘虛供億無所資且賊在東京若入井陘以
取邢洛衛懷收賊財帑乃鼓而南上策也不聽子昂曰然則
趣懷太行道南據河陽扼賊喉襟又不聽曰食太原倉粟右
次陝與澤潞河南懷鄭兵合同紇從之詔以雍王爲天下兵
馬元帥進子昂兼御史中丞

唐太宗與竇建德相持於成臯陵敬進說曰悉宜濟河攻取
懷州河陽使衆將居守更率衆鳴鼓建旗踰太行入上黨先
聲後實傳檄而定漸趨壺口騷駭蒲津收河東之地此策之
上也建德將從之王世充以金玉啗其諸將竟奪其謀 李
光弼與史思明相持韋陟欲加兵陝州退守潼關光弼曰非
奇策也不若移軍河陽北阻澤潞據三城以抗之勝卽擒之

敗卽自守表裏相應使賊不敢西侵此則猿臂之勢也後果
勝之 至德初置澤潞沁節度使治潞州以程千里爲節度
使 澤潞節度使王思禮同河東節度使李光弼將兵助郭
子儀討安慶緒于鄴 澤潞節度使王思禮敗安慶緒于相
州 九節度圍鄴壅漳水灌城城中食盡不能支而諸將不
相統攝政令不一故城久不下李光弼王思禮號令嚴明屢
戰俱勝史思明引兵來救大風晝晦各鎮兵俱潰惟二帥全
軍還鎮 薛嵩以相衛洛邢四州降于李抱玉澤潞節度增
領鄭州及陳邢洛趙四州 澤潞節度增領潁州 昭義節
度使李抱真及王武俊大敗朱滔於貝州滔遁歸范陽 昭
義節度盧從史有逆謀從事孔戡密諫不聽對衆面折又不
改乃引疾歸卒贈司勳員外郎 昭義節度使劉從諫入朝

加同平章事遣歸鎮 劉悟死從諫求爲留後李絳上疏以
爲兵機尙速威斷貴定人情未一乃可伐謀劉悟死已數月
朝廷尙未處分中外人意共惜事機今昭義兵衆必不盡與
從諫同謀縱使其半叶同尙有其半效順從諫未嘗久典兵
馬威惠未加於人今朝廷但速除近澤潞一將充昭義節度
使令兼程赴鎮從諫未及布置新使已至潞州所謂先聲奪
人之心也時李逢吉等計議已定其謀遂寢

五代梁遣楊師厚李思安將兵屯澤州以圖上黨 昭義節
度使李嗣昭帥師圍鎮州鎮將張處瑾遣千人迎糧嗣昭設
伏要擊殺獲殆盡忽矢中其腦嗣昭拔矢反射殪之是夕卒
遺命以澤潞兵授判官任圜督攻號令如一鎮人不知嗣昭
之死也晉王聞之悲痛不御酒肉命其諸子護喪歸葬晉陽

其子繼能不受命帥兵擁喪歸潞子繼能當襲素懦弱繼韜
凶狡囚之詐令士卒劫已爲留後晉王從之 契丹以耿崇
美爲昭義節度使屯澤州將攻潞漢王遣史弘肇進克澤州
契丹從山下河北遁去漢王至洛遂定天下

後梁開平二年三月梁王朱溫如澤州四月至澤州

後唐同光元年以昭義監軍張居翰爲樞密使 莊宗滅梁

拜毛璋華州節度使在鎮多爲不法議者疑其有異志乃徙

璋鎮昭義 朱漢賓依附安重誨復得爲昭義軍節度使

後漢祖建大號郭從義首贊其謀擢鄭州防禦使充東南道
行營都虞侯自太行路渡河漢祖入汴以爲河北都巡檢使
後周王郭威立劉旻子贊爲漢嗣旻喜太原少尹李驥曰郭
公舉兵犯順其勢不能爲漢臣必不能爲劉氏立後因勸旻

以兵下太行控孟津以俟變庶幾贊得立贊立而罷兵可也
旻大罵曰驥腐儒欲離間我父子命左右牽出斬之驥臨刑
歎曰吾爲愚人畫計死誠宜矣 向拱廣順中遷皇城使出
監昭義 慕容延釗世宗時爲殿前散指揮使都校領溪州
刺史高平之戰督左先鋒以功授虎捷左廂都指揮使領本
州團練使 符彥卿存審第四子勇略有謀善用兵軍中謂
之符第四遼人自陽城之敗尤畏彥卿或馬病不飲齧必唾
而呪曰此中豈有符王耶

宋太祖嘗因界上謀者謂劉承鈞曰君家與周氏爲世讎宜
其不屈今我與爾無所間何爲困此一方之人也若有志於
中國宜下太行以決勝負承鈞遣謀者復命曰河東土地兵
甲不足以當中國之十一然承鈞家世非叛者區區守此蓋

懼漢氏之不血食也太祖哀其言故終其世不加兵 建隆元年八月戊子南唐進賀平澤潞 二年春正月甲子澤州刺史張崇誥坐黨李重進棄市

初周世宗幸滄州以李繼勳戰功擢左廂都部署前澤州刺史劉從副之至宋加檢校太尉太祖平澤潞繼勳朝于行在即以爲昭義軍節度 太祖受禪以趙普有佐命功授右諫議大夫充樞密直學士車駕征李筠命普與呂餘慶留京師普願扈從太祖笑曰若勝胄介乎從平上黨遷兵部侍郎樞密副使賜第一區

宋初并代澤潞皆分轄戍卒後并於太原至是以元辰臨鎮遂分領澤潞晉絳磁隰威勝七州軍戎事委元辰專摠之李處耘太祖時授客省使兼樞密承旨右衛將軍從平澤潞

遷羽林大將軍宣徽北院使 太祖征澤潞幸范質第賜黃金器二百兩銀器千兩絹二千匹錢二百萬 太祖親征李筠詔韓令坤率兵屯河陽及澤潞平還京錫宴令坤等于禮賢講武殿賜襲衣器幣鞍勒馬有差以功加侍中 吳時提舉河東常平歲饑發公粟以振民 胡旦太宗時上平燕計曰長淮以北太行以東河水罷災土地甚沃因其豐實取其穀帛減價以祈納見錢以貴糴官府多積兵役無虞用兵豐財可濟大事 景德元年十二月遣使撫諭懷孟澤潞鄭滑等州放強壯歸農 劉庠爲河東轉運使計一路之產鐵利爲饒請復舊冶鼓鑄 李允則使河東路決繫囚原治逋欠王信太原人家故饒財少勇悍大中祥符中盜起晉絳澤潞數州信應募籍軍與其徒生擒賊七十人以功補龍神衛

指揮使 元豐四年五月詔河東路提點刑獄劉定專振被
水民政和元年二月詔陝西河東復鑄夾錫錢 宣和七年
十一月以保靜軍節度使种師道爲河東河北路制置使
靖康元年十月辛丑下哀痛詔命河北河東諸路帥臣傳檄
所部得便宜行事 李彌大上疏乞起河東西境麟府諸郡
以濟姚古之師起河東路及京東近郡兵以濟种師道師中
之師爲腹背攻劫之圖遂除彌大河東宣撫副使 高宗時
張慤建言三河之民怨敵深入骨髓恨不殲殄其類以報國
家之仇請依唐人澤潞步兵雄邊子弟遺意募民聯以什伍
而寓兵于農使合力抗敵謂之巡社爲法精詳前此論民兵
者莫及也 韓世忠移屯山陽遣間結東山豪傑約以緩急
爲應宿州馬秦及太行羣盜多願奉約束者 宋汝爲特轉

通直郎遂上丞相書言諸帥各舉金人奔命敗北之下兀木
深以爲慮計其步騎不過十萬王師雲集其衆數倍今以舟
師自淮繇新河入鉅野澤以步兵自洛渡懷衛入太行山以
襲其內舟師入鉅野則齊魯搖步兵入太行則三晉應賊勢
雖欲合而不分亦難乎爲計矣 郡人王彥連兵太行山以
拒金師克日北伐宗澤召議事使赴行在所竟爲和議所阻
金兵南下隆德府知府張確表言河東天下根本安危所
係無河東豈特秦不可守汴亦不可都矣 金人內侵种師
中以二萬人守滑遣副姚古援太原師中援中山河間或謂
師中自磁相而北金人若下太行則勢不能自還此段疑師
于河上比也師中渡河卽上言黏罕已至澤州臣欲由邢相
間捷出上黨擣其不意當可以遲朝廷疑不用 李綱謂河

北河東國之屏蔽也料理稍就然後中原可保而東南可安
今河東失所者恒代太原澤潞汾晉餘郡猶存也河北失所
者不過正定懷衛濟四州而已其餘三十餘郡皆爲朝廷守
不因此特置司遣使以大慰撫之分兵以援其危急臣恐糧
盡力疲坐受金人之困矣 張浚謂岳飛措畫甚大今已至
伊洛則太行一帶山砦必有應者

金從坦宗室子大安中充尙書省祇候郎興安二年從坦上
奏曰太原已破行及平陽河東郡縣皆不守大抵屯兵少援
兵不至故耳行省兵不滿六千平陽河東之根本河南之藩
籬也乞併懷孟衛州之兵以實潞州調澤州沁水端氏高平
諸兵並山爲營爲平陽聲援惟祈早斷以救倒懸之急是月
元兵至平陽從坦自殺 太行盜陷隆德府殺其守臣姚璠討

平之以山西轉運副使沈璋權知州事宥降卒七百人拜璋
諫議大夫 皇統中高平舉子六七輩赴都試憇於韓店適
一道士徧視諸生得李晏執其手曰公富貴壽考他年當建
節於此值水敗道賴公治之其年登第歷官至中丞歸老起
爲昭義節度使水果敗道父老請修治晏欣然從之卽今石
牒也

元至正中曹州賊入太行山陷冀寧大同路陝西行省左丞
察罕帖木兒遣關保虎林赤擊之 察罕帖木兒率澤潞及
各道兵復汴京

明洪武二十一年遷澤潞無田民往彰德正定歸德太康諸
閑曠之地令自耕種免其徭役三年仍給鈔錠以備耕具
永樂元年詔澤潞等州縣無田民分丁赴裕州墾荒 十年

布政周璟建議太原平陽澤潞應運大同馬草往來三千里
民用困乏而邊地平川秋多青草以時採貯可以足用內地
應納草束就近給驛詔從之 成化十七年免太原三府澤
潞五州去年夏秋稅 正德六年薊寇自壺關南界入太行
山至潞州雄山鄉焚掠而去 崇禎五年流賊由陵川至長
治南界焚掠雄山鄉及壺關平順 十五年叛將任國琦自
松山從河南林縣踰太行夜襲北董鎮
國朝順治六年夏四月姜瓖煽動三晉兵起澤潞城陷賊黨
擅據互相侵掠冬十月征西大將軍和碩王討平之
許補周赧王五十六年秦攻趙定太原上黨
秦莊襄王三年悉拔上黨諸城置太原郡
二世元年趙武臣立爲王使張廩畧上黨

漢元年項羽徙魏王豹於河東漢定三秦豹屬焉敗彭成還
豹叛漢漢三遣韓信擊虜豹以其地爲河東郡

東漢光武建武元年馮異遺李軼書軼不復與異爭鋒異乃
北攻天井關拔上黨兩城 十二月帝遣宗正劉延攻天
井關更始將田邑拒之不得進及更始敗邑請降卽拜上黨
太守

晉永嘉二年劉聰據太行 永嘉三年漢寇壺關東海王越
遣王曠施融拒之踰太行與劉聰戰於長平大敗皆死

北周大統十六年冬十月魏太師泰伐齊不戰而還泰以齊
主洋稱帝伐之至建州齊主自將出頓東城軍容嚴盛會久
雨畜產多死乃還於是河南自洛陽河北自平陽以東皆入
於齊

以上
綱目

唐文德元年七月丙申朔澤州刺史李罕之引太原兵攻河陽爲汴將丁會所敗退還高平罕之保澤州數出鈔懷孟晉絳無休歲人保山谷出爲樵汲者俘斬畧盡啖人爲食數百里無舍烟居民屯聚摩雲山罕之悉攻殺之立柵其上時人號曰李摩雲光化初罕之襲潞州入之克用遣李嗣昭擊澤州拘罕之家屬罕之送款於汴朱全忠遣丁會救之與嗣昭戰舍山嗣昭不利罕之卒嗣昭復取澤州

田補晉永嘉元年王彌寇上黨圍壺關東海王越遣淮南內史王曠安豐太守衛乾等討之及彌戰于高都長平間大敗之死者十六七 是年二月并州諸郡爲劉元海所陷 太元十九年後燕慕容垂遣張崇攻慕容永弟武鄉公友于晉陽永遣其尚書令刁雲率衆五萬屯潞川垂停鄴月餘不進永

攝諸軍還于太行軹關垂進師入自天井關攻永從子征東將軍小豆逸歸鎮東將軍王次多等於臺壁永遣其從弟太尉大豆逸歸救次多等垂將平規擊破之永率衆五萬戰於臺壁南爲垂所敗奔還長子

臺壁晉書作壺壁

永興五年四月上

黨民羣聚爲盜殺守令相率外奔五月大赦天下西河張外建興王紹自以所犯罪重不敢解散遣元屈鎮并州劉潔魏勤鎮西河 永安三年誅爾朱榮爾朱世隆退走詔源子恭鎮太行丹谷十二月壬寅爾朱兆寇丹谷都督崔伯鳳戰歿都督羊文義史作龍降子恭奔退 爾朱榮死爾朱世隆北遁攻建州克之盡殺人以肆其忿 建義三年爾朱世隆退

走停建興之高都爾朱兆自晉陽來會之 中興二年前廢帝安東將軍辛永右將軍建州大都督張悅舉城降 太昌

元年秋七月詔高隆之爲使持節驃騎大將軍儀同三司兼尚書右僕射率步騎十萬趣太行會齊獻武王 齊天保元年周文帝帥師至陝城分騎北渡至建州 周文東至嶠陝遣行臺侯莫陳崇自齊子嶺趨軹關儀同楊擿從鼓鐘道出建州陷孤城公戌詔潘樂總大衆禦之樂晝夜兼行至長子遣儀同韓永興從建州西趨崇崇遂遁 楊擿從周文帝拔弘農自河以北猶附東魏擿謀拔邵郡遣人誘說東魏城堡旬月之間建州太寧等諸城並有請爲內應者因攻而拔之以擿行正平郡事齊神武敗於沙苑擿遂移據東雍州周文以擿有謀畧堪委邊任乃表行建州事時建州遠在敵境然擿恩威夙著所經之處多並贏糧從之比至建州衆已十萬東魏州刺史車折於洛出兵逆戰擿擊敗之又破其行臺斛律俱於州西大獲甲仗及兵資以給義士由是威名大振東魏遣太保侯景攻陷正平復遣行臺薛修義與斛律俱相會於是敵衆漸盛擿以孤軍無援且腹背受敵夜中拔還邵郡朝廷嘉其權以全軍卽授建州刺史轉正平郡守芒山之戰大軍不利擿亦拔還與侯景且戰且退周文嘉之復授建州刺史鎮車箱十二年進授大都督加晉建二州諸軍事進儀同三司尋加開府復鎮邵郡後降齊 大象二年相州總管尉遲迥舉兵石悉以建州應之

隋大業三年五月發河北十餘郡丁男自太行山達於并州以通馳道 十一年十一月己酉賊帥司馬安破長平郡王君廓并州石艾人少亡命爲羣盜聚徒千人轉掠長平李密召之遂投於密

唐武德三年七月太宗率諸軍討王世充遣劉德威自太行東圍河內八年突厥頡利圍并州轉擾潞沁李靖以兵出潞州道總管任瓌屯太行寶應元年建巳月史朝義寇澤州刺史李抱玉敗之代宗卽位回紇請助天子討賊收東都屯河陽三月河北平可汗出澤潞道太原去會昌三年十月巳巳晉絳行營節度石雄及劉稹戰於烏嶺敗之四年四月王宰踰乾河攻澤州河陽王茂元屯萬善別將營天井關爲賊將薛茂卿所破執四將火十七柵張巨進攻萬善不能下茂元欲走會日暮賊自潰去詔忠武王宰以本軍入懷澤行營陳許士稟武賊衆素憚畏茂卿與厚賞失望乃與宰通卽僞挑戰亟北委天井關去左右七營皆潰茂卿奔澤州使諜言于宰曰澤可取吾應於內宰疑不進失期茂卿

被殺宰進破劉公直拔陵川七月昭義降乃詔石雄率軍入潞州朱邪赤心率代北騎軍三千隸石雄爲前軍破石會關助王宰下天井關趙彘從伐潞州收天井關廣明四年春二月河東節度使李克用將出師援陳許河陽節度使諸葛爽以兵屯澤州拒之光啟二年孫儒陷河陽諸葛爽奔歸汴州別將李罕之據澤州三年孫儒去河陽李罕之自澤州收河陽文德元年河南尹張全義以兵襲河陽李罕之出據澤州天祐三年十一月李克用攻潞州全忠守將丁會以澤潞降中和三年十一月李克用遣其弟克修攻昭義孟方立取澤潞二州

後唐同光元年五代史註唐末澤潞屬晉梁初巳得澤州至此又屬晉而梁克之中間不見晉得澤州年月蓋舊史闕不

書五代之亂戰爭攻取彼此得失不常多此類也 建炎十年梁興會太行忠義及兩河豪傑破金人於垣曲又捷於沁水追至孟州之邵原 翟興復陽城縣乘勝取垣曲進至米糧川此事年月未考

金天會四年二月丁巳宗翰次澤州 十一月癸酉撒刺答破天井關復破步兵於孔子廟南宗翰克澤州 元光元年六月丙辰上黨公完顏開復澤州高平縣 正大元年九月移刺蒲哥復澤潞獲馬千匹 六年八月移刺蒲哥再復澤潞

元順帝至正十七年六月劉福通犯汴梁其軍分三道關先生等寇晉冀九月甲午澤州陵川陷縣尹張輔死之

卷之四十九終

澤州府志卷之四十九

紀事 附兵燹

學士大夫過都歷國追維疇曩每增憑弔此晉南舊壤遺跡猶有能說之者况兵戎相構上黨一隅尤為東向必爭之地武事具在故冊類及之知居是者之險艱與守是者之維藩咸宜通曉爾因別為紀事一卷

兵燹

澤之山區用武之地也拜戎之後流為戰國地無不戰而兩上黨之拔子遺悉死秦之孤入後朝梁暮晉偽竊之侵軼節鎮之替逾又復苦之其間大小戰至不能詰其數悲夫殘民遺黎編戶及今非舊版志武事拊其痛深懸其炯鑒也詳異附焉

鳳臺縣

周成王八年冬十月王師滅唐遷其民於杜 十年王命唐

叔虞為侯 穆王五十年西巡逕絕翟道升於太行休於濩

澤於是射鳥獲獸 厲王五十二年唐叔子燮更號晉 靈

王二十二年齊侯伐晉取朝歌為二隊入孟門登太行封少

水孟門上黨隘 元王五年晉丹水反潔一作擊 六年晉滄絕

於梁丹水三日絕不流 威烈王七年晉烈公元年趙獻子

城泣氏韓武子都平陽十七年晉取泣氏濩澤 慎靚王六

年鄭侯使韓辰歸晉陽及向二月城陽向更名陽為河雍向

為高平 赧王五年十二年秦白起伐韓取南陽攻絕太行

道 五十三年秦白起伐韓拔野王上黨守馮亭以十七邑

歸趙 韓惠王十年秦擊韓于太行上黨降 秦昭王四十

四年白起攻太行道絕而韓之野王降 秦莊襄王元年使

蒙驁伐魏取高都

戰國策綦母恢為西周君說魏曰秦悉塞外之兵與周之眾

以攻南陽而兩上黨絕矣魏王因使孟卯致溫圍於周君而

許之成 蘇代為齊與秦穰侯書曰秦得安邑善齊以安之

亦必無患矣秦有安邑則韓魏必無上黨哉 范雎說秦王

曰天下有變為秦受害者莫大於韓王曰寡人欲伐韓韓不聽

為之奈何范雎曰舉兵而攻滎陽則成臯之路不通北斬太

行之道則上黨之兵不下一舉而攻宜陽則其斷而為三韓

必亾焉得不聽

史記秦本紀秦莊襄王二年使蒙驁攻趙定太原三年蒙驁

攻魏高都汲括地志高都故城今澤州是汲故城 拔之攻趙

榆次新城狼孟取三十七城 秦二世元年趙武臣略上黨
魏世家公孫頤謂韓懿侯曰魏瑩與公中緩爭爲太子今魏
瑩得王錯挾上黨固半國也因而除之破魏必矣

齊世家齊莊公四年使欒盈間入晉曲沃爲內應以兵隨之
上太行入孟門欒盈敗齊兵還取朝歌 孝成王二年韓氏
上黨守馮亭使者至曰韓不能守上黨入之于秦其吏民皆
安爲趙不欲爲秦有城市邑十七願再拜入之趙聽王所以
賜吏民王大喜召平陽君豹告之對曰聖人甚禍無故之利
夫秦蠶食韓氏地中絕不令相通固自以爲坐而受上黨也
韓氏所以不入于秦者欲嫁其禍於趙也秦服其勞而趙受
其利雖疆大不能得之于小弱小弱顧能得之于疆大乎豈
可謂非無故之利哉凡秦以牛田之水通糧蠶食上乘倍戰

者裂上國之地其政行不可與爲難必勿受也王曰今發百
萬之軍而攻踰年歷歲未得一城也今以城市邑十七幣吾
國此大利也趙豹出王召平原君與趙禹而謀之曰此大利
不可失也王乃令趙勝受地封馮亭以萬戶馮亭垂涕不見
使者曰吾不處三不義爲主守地不能死固不義一也入之
秦不聽主令不義二矣賣主地而食之不義三矣趙遂發兵
取上黨廉頗將軍軍長平七年廉頗免而趙括代將秦人圍
趙括括以軍降卒四十餘萬皆阬之王悔不聽趙豹之言故
有長平之禍焉

前漢紀漢元年魏王豹謁歸視親疾至則絕河津反爲楚漢
王以韓信爲左丞相與曹參灌嬰俱擊魏九月信等虜豹傳
詣滎陽定魏地置河東太原上黨郡

前漢書任敖沛人也少為獄吏素善高祖遷為上黨守陳豨反敖堅守封為廣阿侯 馮奉世上黨潞人其先馮亭為上黨守秦攻上黨絕太行道亭入城守於趙趙封為華陽君與趙拒秦戰死長平宗族分散及秦滅六國而馮亭之後馮毋擇馮去疾馮劫皆為秦將相焉 元封四年武帝自代而還幸河東 孝景時汲黯以便宜持節發河內倉粟以賑貧民 五鳳三年宣帝行幸河東祀后土

後漢書建武元年正月鄧禹自箕關將入河東箕關今王屋縣東河

東都尉守關不開禹攻十日破之 光武以馮異為孟津將

軍與寇恂合勢拒朱鮪異北攻天井關在澤州晉城縣南今太行山上關南有天

井拔上黨又南下河南成臯以東十三縣及諸屯聚皆平之

王梁與河內太守寇恂南拒洛陽北守天井關朱鮪等不

敢出兵世祖以為梁功 世祖即位遣宗正劉延攻天井關

與田邑連戰十餘合延不得進邑迎母妻子為延所獲後聞

更始敗乃詣洛陽獻璧馬即拜為上黨太守 太行山中有

劇賊太守戴涉聞鮑昱乃承子有智略因就謁請署守高都

長昱應之遂討擊群賊誅其渠帥道路開通 二年遣司空

梁北守天井關擊赤眉 元和二年三月章帝幸東阿北登

太行山至天井關 永初元年春正月大赦天下分犍為南

郡為屬國都尉稟司隸堯豫徐冀并州貧民司隸領河南內河東弘農都

于洛陽魏末 二年二月詔三輔河內河東上黨趙國太原

各修理舊渠通利水道以溉公私田疇 建安十年冬十月

高幹據并州來攻濩澤河東太守杜畿守禦城得不下曹操

徵馬騰將兵擒幹斬之

晉永嘉二年劉元海寇平陽太守宋抽奔京師河東太守力戰死之失名十月劉元海僭帝號於平陽稱漢五年懷帝蒙塵于平陽 建興三年劉聰寇上黨四年愍帝蒙塵于平陽北魏永興五年濩澤劉逸白號征東將軍三巴王王紹為署置官屬攻逼建興郡元城侯元屈等討平之 北魏正光後汾州吐京胡復鳩集北連山胡劉蠡升絳蜀陳雙熾作亂以周喜裴慶孫為別將從軹關入討至齊子嶺東敗賊帥范多等 孝昌二年陳雙熾聚眾反自號始建王曲赦平陽建興正平三郡詔假鎮西將軍都督長孫稚討雙熾平之 出帝太昌元年詔侍中驃騎將軍率步騎十萬趣太行會高歡拒尔未兆 東魏天平初高歡遣三千騎鎮建興益河東兵西魏大統十六年東代帥都督司馬裔請為前鋒遂入建州

破東魏將劉雅興拔其五城

北齊天保元年周文帝率眾至陝城分騎北渡至建州齊文宣親戎出次城東文帝聞齊軍容嚴盛歎曰高歡不死矣

齊晉州敗後雷顯和為建州道行臺右僕射周使其子招之顯和禁其子而不受聞鄴敗乃降

後周建德四年東伐遣柱國梁公侯莫陳芮帥眾一萬守太行道武帝親帥六軍直指河陰八月入齊境五年十月東伐

以大將軍韓明步騎五千守齊子嶺焉氏公尹昇步騎五千守鐘鼓鎮齊子嶺即傅齊嶺周齊分界

隋漢王諒開皇中為并州總管自以所居天下精兵處陰有異圖于是召裴文安為晉州刺史王聃為蒲州薛粹為絳州

梁菩薩為潞州韋道正為韓川張伯英為澤州煬帝遣楊素

率騎五千襲王聃紇單貴於蒲州破之

唐武德元年王須將魏刁兒據澤夏王竇建德襲擊破之

太宗時李勣攻蓋牟城拔之得戶二萬糧十萬以其地爲蓋

州蓋州之名所自始 天寶中安祿山叛河朔盡陷獨平原

太守顏真卿城守具備清河太守使郡人李粵乞師于真卿

真卿謂曰吾兵已出子將何以教我粵曰朝家使程千里統

衆十萬自太行而東將出嚙口限賊不得前公若先伐魏郡

斬賊守袁知泰以勁兵披嚙口出官師討鄴幽陵平原清河

合十萬衆徇洛陽分犀銳制其衝公堅壁勿與戰不數日賊

必潰相圖死真卿然之乃遣大將李擇交等敗賊將于棠邑

張仵者本澤潞將守臨洛廣德中田悅攻之嬰城固守累

月士死糧且盡救不至仵悉召部將立軍門命女出褊拜因

曰諸君戰良苦吾無貲爲賞願以是女賣直爲衆士一日費

士皆哭曰請死戰會馬燧自河東將兵擊悅城下敗之仵乘

勝出戰無不一當百以功遷泗州刺史 會昌三年李德裕

請令王茂元取澤 澤潞節度使劉從諫死從子積擅留守

李德裕請發兵討之時渠將高文端降言澤州兵約萬五千

人賊常分兵大半伏山谷伺官軍攻城疲弊則四集救之今

請令陳許軍過乾河立寨自寨城連延築爲夾城環遶澤州

可破也德裕因奏請詔王宰以陳許精甲攻之 王宰爲光

州刺史有美政累擢邠寧節度使尋徙忠武軍討劉稹李德

裕建言河陽行營進取天井關賊黨離沮德裕以宰乘破竹

勢不遂取澤州以其子晏實守磁州爲顧望計由是有詔切

責宰懼急攻陵川破賊石會關進攻澤州其將郭誼殺積降

宰傳首京師遂節度太原 乾符五年昭義軍節度使李鈞 討李國昌廣明元年昭義軍亂殺其節度使李鈞 廣明元年黃巢入關僖宗西狩詔王徽爲兵部尙書京城四面宣慰 僅陣使昭義高潯與賊戰石橋敗績其將劉廣擅還據潞州 別將孟方立殺廣因取邢洺磁三州貳於已昭義所隸唯澤 一州僖宗以兵部侍郎鄭昌圖權守潞士心多附方立昌圖 不能制朝議宜以大臣鎮撫卽授徽檢校尙書左僕射同中 書門下平章事領昭義節度使是時李克用亦爭澤潞徽商 朝廷力未能以兵抗之奉表固辭詔可更爲諸道租庸供軍 使 中和元年八月昭義軍節度使高潯及黃巢戰於石橋 敗績其將成麟殺潯入於潞州九月澤州天井戍將孟方立 殺成麟自稱留後四年河東節度使李克用及黃巢戰於宛 甸敗之 二年李克用援陳許道天井關諸葛爽懼不肯假 道出屯萬善克用自河中趨汝洛 李克用爲河東節度使 昭義監軍祁審誨乞師求復昭義軍克用遣賀公雅李筠安 金俊三部擊潞州爲方立所破又使李克用進攻之殺李殷銳 遂并潞州表克修爲節度留後 李克用討王行瑜表李罕 之副都統檢校侍中行瑜誅封隴西郡王檢校太尉兼侍中 罕之恃功多嘗私克用愛將蓋寓求一鎮寓爲請克用不許 曰鷹鷂飽則去矣我懼其翻覆也光化初昭義節度使薛志 勤卒罕之夜襲潞入之自稱留後報克用曰志勤死懼他盜 至不俟命輒屯於潞克用遣李嗣昭先擊澤州拘罕之家屬 送太原罕之攻沁州執刺史守將送欵於汴朱全忠表罕之 昭義節度使命丁會援之與嗣昭戰含山嗣昭不利葛從周

取澤州嗣昭又攻罕之罕之暴得病不能嗣會代戍全忠更以罕之節度河陽三城卒于行未幾嗣昭復取澤州以李存璋爲刺史 昭宗時李嗣昭以步騎三萬下太行略河內拔懷州進攻河陽汴人閻寶救之嗣昭退保懷 光化元年十一月李克用陷澤州二年三月朱全忠陷澤州八月李克用復陷澤州及潞懷二州天復元年四月朱全忠復陷澤州及沁州 天祐三年李克用陷澤潞二州昭義軍節度使丁會叛附于克用 廣明中潞州節度使高潯攻諸葛爽於河陽遣方立將兵出天井關爲先鋒潯爲其將劉廣所逐廣爲亂軍所殺方立聞亂引兵自天井關入據潞州唐因以爲昭義軍節度使昭義所節制澤潞邢洺磁五州而治潞州方立謂潞州山川高險而人俗悍勁自劉植以來常逐其帥且已邢人也因徙其軍于邢州而潞人怨方立之徙也因以澤潞二州歸於晉晉遣李克修爲澤潞節度使方立以邢洺磁自爲昭義昭義有兩節度自此始 光化二年李克用取澤潞以孟遷爲節度使天復元年梁大舉攻晉氏叔琮出太行天井關遷開門降梁取澤潞 李嗣肱少有膽略數立戰功唐天祐中起拜蔚州刺史累遷澤代二州刺史 河東李克用下兵太行渡河出洛陽與東兵會擊黃巢敗之 丁會以潞州叛梁降晉梁朱溫命康懷英爲昭討使將行溫戒之期必得潞州乃築夾城圍之晉遣周德威屯於亂柳數攻夾城懷英不敢出戰溫乃以李思安代懷英將久之亦無功溫怒自至澤州爲懷英等軍援且督之已而李克用卒晉王存勗名德威還太原溫聞晉有喪德威去溫亦歸洛陽而諸將亦少弛

晉王謂諸將曰梁人幸我大喪謂我少而新立無能爲也宜乘其怠擊之乃出兵趨上黨行至三垂岡歎曰此先王置酒處也會天大霧晝暝兵行霧中攻其夾城破之懷英大敗以首騎遁歸 後梁徐懷玉遷右羽林統軍屯於澤州晉人攻之爲隧以入懷玉擊之隧中晉人乃却 朱友謙附于晉朱友珪遣招討使韓勅將康懷英等兵五萬擊友謙晉王出澤潞以救之遇懷英於解州大破之 唐梁相拒於河上李嗣昭子繼韜以潞州叛降梁唐莊宗有憂色召李嗣源帳中謂曰繼韜以上黨降梁而梁方急攻澤州吾出不意攻其鄆州以斷梁右臂可乎嗣源對曰夾河之兵久矣苟非出奇則大計不決臣請獨當之乃以步騎五千涉濟至鄆 州鄆人無備遂襲破之

後漢天福十二年史弘肇取澤州翟令奇等皆迎弘肇自歸後周顯德元年三月乙酉世宗如潞州以攻漢壬辰次澤州闕兵於北郊癸巳戰于高原敗之追及于高平又敗之

宋建隆元年夏四月癸巳昭義軍節度使李筠叛遣人殺澤州刺史張福往據其城求濟師于劉鈞鈞率兵與遼兵數萬援之詔遣歸德軍節度使石守信往討五月庚子遣昭化軍節度使慕容延釗彰德軍節度使王全斌將兵出東道會守信癸卯守信與高懷德敗李筠于長平斬首三千級甲辰命諸道進討丁巳詔親征命天平軍節度使韓令坤屯兵河陽巳未發京師丁卯石守信高懷德破筠衆三萬于澤州獲僞河陽節度范守圖殺筠監軍使盧贇及北漢援兵之降者數千人筠遁入澤州太祖至大儀頓守信馳奏城破在朝夕大

駕親臨一鼓可平戊辰王師圍之筠龍捷使王廷魯吐渾留
 後汾州團練使王全德率所部自昭義來降筠益失援太祖
 督戰六月辛未拔澤州筠赴火死乙酉伐上黨丁亥筠子守
 節以城降赦之上如潞甲午永安軍節度使折德辰破漢沙
 谷砦秋七月戊申上至自潞 建德初太祖受禪遣使諭李
 筠筠即欲拒命左右為陳曆數方俛俛下拜貌猶不恭及延
 使者升階置酒張樂遠索周祖畫像懸壁涕泣不已賓佐惶
 駭告使臣曰令公被酒失其常性幸勿為訝及太原劉鈞以
 蠟書結筠其子守節泣諫筠不聽遂起兵令幕府為檄書辭
 多不遜從事閻邱仲卿獻策于筠曰公以孤軍舉事其勢甚
 危雖倚河東之援亦恐不得其力大梁兵甲精銳難與爭鋒
 不如西下太行直抵懷孟塞虎牢據河邑東向而爭天下計

之上也筠不能用留其子守節守上黨引眾南向太祖將兵
 討之敕石守信等曰勿縱筠下太行急進師扼其隘破之必
 矣太祖遂親征山路險峻多石不可行太祖先于馬上負數
 石羣臣六軍皆負之即日平為大道與守信等會破筠衆于
 澤南降者三千餘人筠敗走 太祖征李筠西京留守向拱
 迎謁至汜水言於上曰筠逆節久著兵力日盛陛下宜急濟
 大河踰太行乘其未集而誅之緩則勢張難為力矣上從其
 言卷甲倍道趨之筠果率兵南向聞車駕至惶駭走澤州城
 守遂見擒 李筠叛吳廷祚白太祖曰潞城崑險且阻太行
 賊據之未易破也筠素勇而輕若速擊之必離上黨來邀我
 戰猶獸亡其藪魚脫於淵因可擒矣以廷祚留守東京兼判
 開封府筠果領兵來戰澤州南其眾敗走 李筠叛命李崇

矩率龍捷驍武左右射禁軍數千人屯河陽以所部攻大會
砦拔之斬首五百級改澤潞南面行營前軍都監與石守信
等同破筠衆于碾子谷及平澤潞遣崇矩先入城收圖籍視
府庫 李筠鎮上黨募亡命多爲不法漸屈彊難制檢校太
尉張美度筠必叛陰積粟於懷孟間後筠果叛太祖親討之
大軍十萬出太行經費無缺美有力焉 太祖征李筠高防
爲潞州東北路計度轉運使澤潞平拜尙書左丞 蔡審廷
授殿前散都頭指揮使從征李筠攻澤州先登爲飛石傷足
太祖賜以良藥美酒及車駕還京幸其官署問之賜賚甚厚
太祖征李筠張勳從石守信董前軍拔大會砦敗筠衆于
太行破澤州勳與有功 張暉從征澤潞爲行營壕砦使先
登陷陣事平遷華州團練使建隆二年太原未下詔入覲問

計暉對曰澤潞經李筠之叛瘡痍未復軍旅一興恐人力重
困不若戢兵育民俟富庶而後爲謀乃賜襲衣金帶鞍勒馬
令還朝 建隆初太祖親征澤潞遷郭進本州防禦使充西
山巡檢 康再遇爲龍捷指揮使從太祖征李筠死于兵詔
以其子保裔代父職從石守信破澤州 王審琦宋初擢爲
殿前都指揮使領秦寧軍節度從征李筠爲御營前洞屋都
部署爲飛石所傷車駕臨視澤潞平改領武成軍節度 羅
彥瓌從太祖平澤潞還命代趙彥徽爲侍衛步軍都指揮使
領武信軍節度 驍武副指揮田紹斌從崔彥進征李筠攻
大會砦破之又敗筠于澤州茶碾村筠退保澤州紹斌鑿壕
圍守流矢中左目殺筠軍益衆奪其鎧甲 宋初征李筠筠
退保澤州城固可守攻之未克太祖詔馬全義賜食御榻前

問計對曰筠守孤城併力急攻立可殄滅倘緩之適足長其
奸耳太祖曰是吾心也卽麾兵急擊之全義率敢死士乘城
攀堞而上飛矢貫臂血流被體全義拔鏃臨敵士氣益奮遂
克其城 袁繼忠以父任補右班殿直太祖平澤潞討并汾
悉有力焉 崔翰宋初遷御馬直副指揮使從征澤潞 建
隆初征澤潞命邊光範爲前軍轉運計度鄭洛汝孟懷芻糧
宋李至擢著作郎直史館會征太原命督澤潞芻糧累遷
右補闕知制誥 魏丕宋開寶末領代州刺史凡典工作十
餘年討澤潞等州太祖皆先期諭旨令修葺器械無不精辦
馬令琮太祖時充先鋒都指揮使澤潞平爲昭義兵馬鈐
轄 太祖征晉陽石曦領兵二千人自澤潞除道至太原壅
汾水灌其城 解暉宋初爲步軍都頭從征澤州力戰日中

流矢師還爲內外馬步軍副都軍頭 徐興隸御龍直會平
澤潞上其功補控鶴軍使 宣和四年三月遼人立燕王溥
爲帝金人來約夾攻命童貫爲河北河東路宣撫使屯兵于
邊以應之 靖康元年五月金人入寇姚古將兵至威勝聞
粘罕將至衆驚潰河東大振河北河東路制置副使种師中
與金人戰于榆次死之八月都統制折可求師潰于子夏山
威勝隆德汾晉澤絳民皆渡河南奔十月金人陷澤州十一
月知澤州高世由以城降于金 郭忠孝走關陝得勝兵三
萬隸十將擇一將統之繼遣兵趣澤潞聽宣撫司節制金人
再犯京師永興帥范致虛率諸軍繇淆澗入援忠孝曰金人
深入而河東無守備願分兵走太行扼其歸路彼必來戰城
下之圍可緩致虛以爲然檄河中守席益馮翊守唐重與忠

孝同出河東爲牽制之舉 建炎元年九月王彥及金人戰敗績奔太行山聚衆其裨將岳飛引其部曲自爲一隊 岳飛從王彥渡河至新鄉金兵盛彥不敢進飛獨引所部鏖戰遂拔新鄉翌日又敗之夜屯石門山下或傳金兵復至一軍皆驚飛堅卧不動金兵卒不來食盡走彥壁乞糧彥不許飛引兵益北戰于太行山擒金將拓拔耶烏居數日復遇敵飛單騎持丈八鐵槍刺殺黑風大王敵衆敗走 岳飛軍鄂州太行山忠義社梁興等百餘人慕飛義率衆來歸飛旣大敗兀朮於鄆城遣子雲速援王貴又敗之于潁昌兀朮遁去與會太行忠義及兩河豪傑累戰皆捷中原大震飛進軍朱仙鎮與兀朮對壘而陣又大破之先是飛遣興等布德意招結兩河豪傑山砦韋銓孫謀等斂兵固堡以待王師李通胡興張恩孫琪等舉衆來歸金人動息山川險要一時皆得其實盡磁相開德澤潞晉絳汾隰之境皆期日興兵與官軍會其所揭旗以岳爲號自燕以南金號令不行矣

金天會四年二月以滑瀆二州還宋宗翰復定威勝軍攻下隆德府師次澤州三月還西京 八年十一月撒刺答破天井關宗翰克澤州 天會末太行山賊往往嘯聚知澤州王伯龍平之 天眷元年南京馬步軍都指揮使徐文破太行賊梁小哥 興定二年十月元兵攻澤州 五年正月元兵攻天井關 元光元年七月上黨公完顏開復澤州 正大元年九月樞密判官移刺蒲阿復澤潞獲馬千匹 六年八月移刺蒲阿再復澤潞

元癸酉秋分兵三道命皇子木赤察合台窩闊台爲右軍循

太行而南掠澤潞遼沁等州而還。丁丑八月詔諭太師國
王木華黎曰太行之北朕自經略太行以南卿其勉之木華
黎自西京由太和嶺入河東攻太原忻代澤潞等州悉降之
辛巳木華黎承制授耶律忒未真定潞安撫使洛州元帥
進兵臨澤潞降其民六千餘戶以功遷河北西路安撫使兼
澤潞元帥府事壬午致仕退居真定。世祖中統二年以太
行一帶東至平灤西控關陝應有險阻於附近民內選諳武
事者修立堡寨守禦。順帝至正十七年十月曹州賊入太
行山。十八年曹濮賊分道踰太行焚上黨掠晉冀陷雲中
雁門代郡烽火數千里復大掠南且還察罕帖木兒先遣兵
伏南山阻隘而目勒重兵屯聞喜絳陽賊果走南山縱伏兵
橫擊之賊皆走山谷其得南還者無幾乃分兵屯澤州塞碗
子城屯上黨塞吾兒谷屯并州塞井陘口以杜太行諸道賊
屢至守將數血戰擊却之河東悉定。十九年察罕帖木兒
發晉兵出太行會汴及河南定以兵分鎮關陝荆襄河洛江
淮而重兵統太行營壘旌旗相望數千里乃日脩車船繕甲
兵務農積穀訓練士卒謀大舉以復山東。至正末擴廓帖
木兒有不臣之心貊高關保等皆叛之列其罪狀聞於朝詔
落職凡擴廓帖木兒所總諸軍令白鎖住虎林赤等領之擴
廓帖木兒既受詔自彰德退軍屯澤州詔又命禿魯與李思
齊張良弼等率兵東向以正天討皇太子命魏贊因不花及
關保皆以兵與思齊良弼諸軍夾攻澤州擴廓帖木兒退守
于平陽關保遂據澤潞二州。

明洪武元年僉大都督府事陳德破澤州磨盤寨獲元參政

喻仁遂會大軍克平陽九月馮宗異湯和至太行山碗子城破其關取澤州元守將賀宗哲等先遁留兵戍守 崇禎五年流賊掠大陽鎮九月賊犯州西客將吳開先禦于王壁村頗有殺傷賊遁尋追擊至留墩開先戰死民兵千二百人陣沒陽和兵掩擊于陵川遂大破之初吳開先戰澤州城西賊敗去旋再犯澤攻八日陷之遠近震動 劉令譽按豫日記崇禎五年七月十六日潰賊近河內柏鄉鎮予料賊必犯紫陵紫陵距郡城十五里爲太行山通清化必繇之路卽面促曹帥文詔邀擊惜兵行稍緩未扼其吭第擊其尾尙斬級二百五十二顆賊大勢奔晉而扎老營于漢高城焉十七日鄧鎮玘于清化斬級二十七顆十八日曹鄧二帥往勦漢高城賊賊遺弃婦女騾馬甚衆兵貪餌賊遂兔脫 劉令譽會勦

晉寇檄仙神口西北有磨子灘乃晉地也其始藏樂伶賊五十人不時犯口而沿山天井關等處走爲熟徑今數已滿千結營于聖王坪深溝高壘日遣馬賊百餘混擾晉豫間 流賊寇脩武清化者竄入平陽時副總兵左良玉將昌平兵往援河南因檄入山西禦之頗有斬獲河南巡撫樊尙璟以良玉駐澤州扼豫晉咽喉可四面爲援兵從之時曹文詔將陝西兵上令良玉受尙璟節制與文詔同討賊有急則秦兵東豫兵西良玉兵從中橫擊六年正月賊犯隰州陷陽城良玉敗之于涉縣之西陝二月又敗賊于武安 六年三月賊從河內上太行臨洮總兵曹文詔大敗之澤州賊走潞安文詔至陽城遇賊不擊自沁水潛師還擊之斬首千餘四月賊犯州西秋蘿李寨村副將李罕駐周村兵單不前俄總兵曹文

詔至時漏下三刻襲于潤城斬一千五百級六月辛巳左良玉破賊于懷慶賊盡奔太行山

國朝順治元年賊劉芳亮據澤州 大兵至乃潰九月賊劉忠破葦町堡六年賊陳杜張斗光據州討平之

高平縣

周安王二十六年趙韓魏廢其君食以端氏一城

史記趙世家趙成侯與韓昭侯遇上黨十六年與韓魏分晉

封晉氏以端氏 肅侯元年奪晉君端氏徙居屯留 秦本

紀秦昭襄王二十七年白起攻趙取代光狼城 括地志曰光狼故城在澤

州高平縣西 四十七年秦攻韓上黨上黨降趙秦因攻趙趙發

兵擊秦秦使白起大破趙於長平四十餘萬盡殺之

戰國策白起率數萬之師攻強趙北坑馬服誅屠四十餘萬

之衆流血成川沸聲若雷使秦業帝自是之後趙楚懾服不

敢攻秦者白起之勢也 秦昭王復欲伐趙武安君白起曰

長平之事秦軍大克趙軍大敗趙人之死者不得收傷者不

得療涕泣相哀戮力同憂當今之時趙未可伐也王曰微白

起吾不能滅趙乃使王陵更使王齧圍邯鄲十七月死傷者

衆而弗下

隋大業十年賊帥司馬長安破長平郡

唐會昌中王師伐劉稹武宗以盧鈞寬厚能得衆詔兼節度

昭義會稹死敕乘驛進檢校兵部尚書專領昭義鈞及潞石

雄兵已入而稹將白惟信率餘卒三千保潞城未下雄召之

使往十餘輩皆死鈞次高平惟信乃獻款

五代史漢劉旻乞兵于契丹契丹遣楊衮將鐵馬萬騎及奚

諸部六萬人號稱十萬以助旻旻以張元徽爲先鋒自將騎兵三萬攻潞州潞州李筠遣穆令鈞以步騎二千拒元徽于太平驛元徽擊敗之遂圍潞州是時周世宗新卽位謂旻幸周有大喪而天子新立必不能出兵宜自將以擊其不意顯德元年親征甲午戰于高平李重進白重贊將左樊愛能何徽將右向訓史彥超居中軍張承德以禁兵衛蹕旻亦列爲三陣張元徽居東偏楊衮居西偏旻居其中衮望周師謂旻曰勅敵也未可輕動旻奮髯然曰時不可失毋妄言衮怒而去旻號令東偏先進王得中叩馬諫曰南風甚急非北軍之利也宜少待之旻怒曰老措大毋妄沮吾軍卽麾元徽元徽擊周右軍兵始交愛能徽退走其騎軍亂步卒數千棄甲叛降元徽呼萬歲聲振川谷世宗大駭躬督戰士士皆奮擊爭先而風勢愈盛旻自麾赤幟收軍軍不可遏旻遂敗日暮旻收餘兵萬人阻澗而止是時周之後軍劉詞將之在後未至而世宗銳于速戰戰已勝詞軍繼至因乘勝追擊之旻又大敗輜重器甲乘輿服御皆爲周師所獲旻獨乘契丹黃騮自鵬窠嶺間道馳去

周廣順時劉崇南侵周祖威命韓通赴河中王彥超出晉州道擊之敗于高平以通爲太原北面行營部署 范質從征高平還加司徒弘文館大學士 顯德初李崇矩補供奉官從征高平以功轉供備庫副使 劉崇南寇周世宗命王彥超領兵趣晉州路東向邀擊從戰高平彥超自陰地關與符彥卿會兵圍汾州州將董希顏以城降 劉崇入寇遣馬軍樊愛能步軍何徽赴澤州令向拱監護之世宗親征拱以精

騎居陣中高平之捷以功兼義成軍節度河東行營前軍都監韓重贊從世宗戰高平以功遷鐵騎指揮使石守信從世宗征晉陽遇敵高平力戰遷親衛左第一軍都校尹崇珂世宗時補東西都知從戰高平有勞績遷本班副點檢曹翰世宗時補供奉官從征高平叅豫謀畫尋遷樞密宋初從征澤潞還改濟州刺史李穀從世宗征太原遇賊于高平匿山谷中信宿而出皆居潤顯德初從征高平以功遷客省使知青州宗太祖立加檢校太尉及征澤潞命赴澶州巡檢蔡審廷顯德初從戰高平有功遷軍使王晉世宗時補東頭供奉官從戰高平世宗戰高平戮不用命者因求驍勇士通書舍人李延傑以荆罕儒聞范廷召世宗時人補衛士從征高平戰疾力遷殿前指揮使劉崇入寇

世宗親征至高平不利諸將多引退馬仁瑀謂衆曰主辱臣死安用我輩乃控弦躍馬挺身出戰射賊斃者數十人士氣益振大軍乘之崇遂敗世宗北征大將高懷德董遵誨之舅也表遵誨從行師次高平與晉人遇將接戰晉兵未成列懷德命遵誨先出奇兵擊之晉人潰大軍繼進遂敗之

宋靖康元年金師至高平知澤州高世由往犒之兵乃去金師圍太原守將折可求劉光世軍皆敗平陽府義兵亦叛導金人入南北關取隆德府遂攻高平李邦彥咎李綱盡遣城下兵追敵上倉皇無措急徵諸將還諸將已追及金人于邢趙間遽得還師之命無不扼腕比綱力爭復追而將士解體矣

金元光元年六月上黨公完顏開復澤州高平縣

元至正十八年五月關保與賊戰于高平敗之

明崇禎五年游擊猛如虎擊邢紅狼于高平解其圍

國朝順治元年九月餘賊劫攻高平署縣周再勳拒守

陽城縣

商湯革夏二十四年大旱王禱於桑林雨 二十五年作大

獲樂

皇甫謐曰樂一名桑林左傳襄公十年宋享晉侯以桑林

晉義熙十二年丁零翟猛雀驅掠吏民入白嶠山為亂魏遣

張蒲長孫道生討之

白嶠山在陽城

西魏大統十七年楊樹拒齊師繇侯井里下邵原

後晉開運中李萬超從杜重威拒契丹於陽城流矢貫手萬

超拔矢復戰神色自若以功遷肅銳指揮使

宋建炎時河東北雖陷豪傑聚眾保險河南孟汝唐州鎮撫

使翟興遣蠟書約結之向密王簡王英輩皆願授節制奏上

授與河東北路軍馬使徧檄山砦由是汾澤潞懷衛間山砦

首領皆應命遣子崧生擒金河東都統保骨遂復陽城縣乘

勝取絳之垣曲進至米糧川

金孔彥舟討平太行山車轅賊

明正德七年霸州賊劉六劉七等

劉六名寵劉七名宸

至陽城縣東白

巷等村民以鐵鍋排列衢巷登屋用瓦擊之賊不能入引去

嘉靖二十四年河南賊六七十人擾下交都等村陽城典

史王標追襲遇害於白桑村 四十四年西南八十里沁水

難川賊牛大牛二延三等假開墾山田劫掠敗會勦官兵用

招撫計擒之 崇禎四年河曲賊王嘉印轉掠至陽城南山

延綏副總兵曹文詔追及之其下斬以降五月王嘉印繇沁

水經縣西趨南山賊黨斬其首以降六月副總兵曹文詔擊
斬賊王嘉印於陽城其黨復推王自用爲首號曰紫金梁其
黨自相名目有老猢猻八金剛闖王闖將八大王掃地王闖
塌天破甲錐邢紅狼亂世王混天王顯道神鄉里人活地草
等分爲三十六營五年流賊躡山西監司王肇生知歙人吳
開先勇略便宜置爲將使擊賊戰澤州城西賊敗去從沁水
轉掠陽城開先恃勇渡沁戰北留墩下擊斬數百人砲盡無
援一軍盡沒賊遂陷澤七月紫金梁老猢猻自沁水端氏犯
縣東入澤州大陽去八月自沁水竇莊犯縣東北西南入沁
水翼城去十月自長子遁入境陽和兵大勝于陽泉十一月
自沁水榭山入境總兵尤世祿失利次日勝之游擊白安大
敗賊于北鄉十二月復自沁水入境六年二月犯縣南從邵
原關下濟源三月繇西入境總兵曹文詔大戰於芹池劉村
四月犯縣東曹文詔襲之于潤城大敗之五月西入境裨將
艾萬年追襲敗績九月餘寇二郎神盤踞十字河邑人石鳳
臺撫其衆五百孤山副總兵李卑敗賊於陽城之郎家山又
與艾萬年連敗之南獨泉土河村復敗之茆堰村

按澤之受流賊禍不一而足賊至則無兵任其蹂躪兵至
則尾後甚至殺難民以首功其爲民受害者更甚於賊故明
紀語云兵多尾賊而不殺賊又云兵來篋汝賊來梳邑人
張藐山太宰點燈行讀之可爲髮指今紀載中如河曲賊
王嘉印掠陽城崇禎四年載嘉印已爲總兵曹文詔追及
有其下斬以降之文矣五月復又云河曲賊王嘉印趨南
山賊黨斬以降六月又有曹文詔斬賊王嘉印於陽城一

事而三見雖上下文義不相蒙一時紀載襍復類引未可
卽訾然其時之將卒燭亂瑩聽絕無紀律已視此可見况
將驕兵橫至則只辦索餉鈔掠村市爲之一空賊與兵又
何分之有先時曲突徙薪之疏多有見及者而其如一不
致省何因感此論及

國朝順治元年十月賊劉忠繇潞安至城下攻圍十一日邑
人堅守時潘貞善火礮發無不中賊遁四年邪教高飛王希
堯衆千人據腰盆照壁龕官兵勦除之

陵川縣

唐會昌三年河陽行營招討使王宰進破劉公直拔陵川王
宰急攻陵川破賊石會關進攻澤州昭義將郭誼殺劉楨降
金元光元年蒙古木華黎攻陵川破之

元至正四年七月益都瀕海鹽徒郭火你赤作亂八月上太
行山由陵川入壺關至廣平殺兵馬指揮復還益都十七年
九月破頭潘先生陷澤州陵川縣尹張輔死之

明洪武元年八月大將軍徐達以鎮撫吳勉攝大都路府事
檄韓政自東昌分兵守廣平陵川 崇禎五年九月賊勢嚮
河北山西巡撫宋統殷備兵冀北王肇生率軍次陵川扼賊
北歸賊北走遇官軍賊死鬪互相勝負會夜與賊爭險對營
兩山頭賊緣窮谷而登大譟官軍亂統殷肇生皆走與諸軍
相失宣大總督張宗衡將兵至高平統殷肇生以師畢會大
破賊於桑子鎮賊復入沁水宣大總督張宗衡聞移駐平陽
命提陽和兵從澤州尾賊至陵川勝之再敗賊潞安之西火
斬二千級連戰陽城之陽泉沁水之毛連溝鹿臺寺石塔杏

谷並破之俘斬千人六年兵部以晉賊之急有三西在平陽東在澤潞西北在汾太沁遼議督臣張宗衡駐平陽任東西二賊將白安虎大威四千人以平陽澤潞四十一州縣責之加以李甲兵一千賀人龍兵一千左良玉兵二千五百共八千人撫臣許鼎臣駐汾州任西北賊將張應昌苟伏威二千人以汾太沁遼三十八州縣責之加史記事頗希牧兵一千艾萬年兵一千五百寧武兵一千岢嵐代州北接利民馬站老營兵二千共七千人宗衡提陽和兵從澤州潛師尾賊後至于陵川勝之再擊賊於潞安之西火大勝之斬首二千級輝縣之北陵川之南有村曰水峪同賊竊據數十年大為民患崇禎三年河南副使祝萬齡監軍磁州與山西監司王肇生合兵擊之六戰焚其巢賊遂平已而流賊自山西入河

沁水縣

北掠新鄉萬齡繫之賊走陵川已復大至新鄉

周武王十三年封庶弟于原為原國

原在沁水東北說見別注

襄王十

三年晉侯遷原伯貫於翼以趙衰為原大夫

晉太元十五年春正月西燕慕容永率眾向洛陽朱序自河

陰北濟與永偽將王次等相遇乃戰于沁水次敗走斬其支

將勿支首叅軍趙睦江夏相桓不才追永破之于太行永歸

上黨時楊楷聚眾數千在湖陝間永敗遣任子詣序乞降序

追永至上黨之白水與永相持三旬聞翟遼欲向金墉乃還

魏建義元年葛榮使其僕射任褒率車三萬餘乘南寇至沁

水詔太尉公上黨王元天穆討葛榮次於朝歌之南

北周宣帝時郎公肅孝寬為東道元帥師次永橋沁水泛長

兵未得渡

唐會昌三年十月晉絳行營節度使石雄及劉稹戰于烏嶺敗之

五代史李克修卒以克恭代爲昭義軍節度使多橫暴不法又不習軍事由是潞人皆怨克恭選後院勁兵獻於唐祖李克用行至銅鞮其將馮霸以其徒叛太祖遣李元審討之戰於沁水元審大敗奔入潞州 劉崇僭號太原周主郭威思得方略之士以備邊遣陳思讓率兵詣磁州控扼澤潞廣順元年九月劉崇遣大將李瓌領馬步軍各五都鄉兵十都自團栢軍於鷓子店思讓與都監向訓等率龍捷吐渾軍至虎亭西與瓌軍遇殺三百餘人生擒百人獲崇偏將王璠曹海金馬五十匹俄遣王峻援晉州以思讓與康延昭分爲左右

廂排陣使令率軍自烏嶺路至絳州與大軍合崇燒營遁去宋岳飛遣梁興渡河糾合忠義社取河東北州縣與會太行忠義及兩河豪傑趙雲李晉董榮牛顯張峪等破金人於垣曲又捷於沁水追至孟州之邵原取懷衛二州大破兀朮軍斷山東河北金帛馬綱之路金人大擾

明湯和康茂才駐師二十餘日以殲韓平章之衆 崇禎四年河曲賊王嘉印繇沁水入陽城五年七月山西巡撫宋統殷擊賊于長子賊奔沁水庚辰賊首紫金梁老猗猗八金剛以三萬衆圍寶莊時張道濬家居率其族禦之賊多死聞秦師且至懼欲乞撫紫金梁呼於壁下道濬登陴見之紫金梁免胄前曰我王自用也向誤從王嘉印故至此此來乞降耳俄老猗猗亦至道濬諭之曰急還所俘散若徒衆吾爲請于

撫軍貸爾死賊乃還所掠拔營而西入陽城界道濬以賊情告統殷曰賊狡未可信因遣使往覘賊諸賊咸就約惟八大王闖場天五營不受命紫金梁歸欵未決諸軍乘賊不備輕騎襲賊營賊怒南犯濟源陷温縣張道濬見賊一賊前致好詞本宜川諸生韓廷憲也乃與定約巡撫宋統殷命守備薛天祿往受之宣大總督張宗樞部兵乘不備掩襲賊怒殺天祿復叛而南下廷憲以三騎來歸偵亂世王與紫金梁爭一村婦貽書間之賊果疑分七大部多者萬人少者數千人圍孟縣殘忻州窺定襄躡五臺勢尤熾六年五月賊犯沁水總兵曹文詔大敗之擒其魁大虎又敗之遼城毛嶺七月辛丑賊陷城賊自秦入晉五犯沁水至是陷之十年陽和兵敗賊于鹿臺石塔

澤州府志卷之五十

祥異

商成湯二十四年大旱王禱于桑林

周元王五年丹水反擊六年丹水三日絕不流竹書紀年

威烈王三年晉大旱地生鹽竹書紀年

慎靚王時月生齒齧畢大星陽城志

前漢宣帝五鳳三年上黨大熟黃龍二年閏月客星見昴

分居卷舌東五尺許青白色炎長三寸省志云考天文志乃元帝初元二年

也

成帝陽朔二年秋關東大水流民欲入函谷天井壺口五

阮開者勿苛留前漢史

哀帝建平四年上黨地裂

後漢安帝永初元年夏六月丁巳河東楊地陷東西百四十步南北百二十步深三丈五尺 二年正月稟河南下邳

東萊河內貧民古今注曰時州郡大饑米石二千人相食老弱相棄道路 三年并凉

二州大饑人相食後漢書 延光二年三月濩澤大風拔樹

桓帝永壽三年秋七月河東地裂後漢書 永康元年秋八月

月巳亥泫氏縣地裂按漢紀永康元年八月十五日夜泫氏地裂數十丈即今王報寺莊白方

曹魏末元帝咸熙二年春二月太行崩晉書 武帝泰始元年冬十二月鳳凰見上黨高都 三年春三月

辰河東平陽地震 三年八月上黨霜害三豆晉書 太康元年春三月河東霜雹傷桑麥

二年雨雹傷桑麥 三年大風折木壞屋舊志 五年九月上黨災風傷稼晉書

黨大風傷禾稼晉書 永寧元年冬十月乙亥端氏風雹折

木電大如雞卵自晝至夜平地幾三尺樹木盡折高平志

愍帝建興元年十二月河東地震雨肉晉書 四年大蝗民

東晉元帝永昌元年冬十二月幽并大雪晉五行志 省志

明帝太寧元年十二月幽并大雪晉五行志 省志云 宋志作并州大雪

穆帝永和十年三月并地前後進蒼麟十六白鹿七 八

月大雪 十一年正月上黨郡獻白雉省志

孝武帝太元九年秋九月澤州旱饑井涸舊省志 今省志云按隋開皇

初改長平郡為澤州此不知何考

北魏道武帝天興四年正月上黨郡獻白雉

明元帝永興四年十月辛亥月掩天關占曰有兵後獲澤

民劉逸自號征東將軍三巴王署置官屬攻逼建興郡元

城侯元屈等討平之

太武帝神麤元年二月上黨郡獻白雉 太平真君六年

二月西幸上黨觀連理樹於泣氏已上魏書

孝文帝太和十年七月張萬壽言建興濩澤縣民賈自成

四月中養蠶有絲網成幕中有卷物似絹帶長四尺廣三

寸薄上復得黃繭二狀如履形省志

宣武帝正始四年九月丙戌司州民饑開倉賑卹魏書

北齊文宣帝天保八年蝗州志

北周武帝建德五年十一月己卯河東地震 六年高平獲

赤雀省志

隋文帝開皇元年二月辛巳高平獲赤雀隋書

唐高祖武德二年太行山聖人崖有聲夏駒虞見舊州志

太祖貞觀十三年州鼠害稼舊州志 十五年疫 十七年

夏疫 二十年白鹿見州志

元宗開元十二年澤潞大旱帝設壇宮中親禱暴立三日

八月澤潞諸州霜殺稼潞安府志

肅宗乾元二年秋不雨高平志自夏六月不雨至秋九月不雨禾黍一空有司發倉廩以賑
貸仍告糴於懷孟

代宗大曆五年十一月澤州嘉禾生是歲大有年州志

德宗建中元年慶雲見于郡南刺史李鷄具圖以獻舊州志

興元元年冬十月潞澤河東節度螟蝗為害蒸民饑饉每

節度詔賜米五萬石舊唐書

憲宗元和四年十二月羣鳥夜集於太行山上五行志 十

二年六月河中潞澤晉隰水害稼五行志

僖宗中和二年夏晝積陰六十日州志按省志又云僖宗光啟二年夏積陰六

十日

五代後周太祖廣順三年河南北諸州旬日無鳥既而聚澤

潞山谷中集於林木壓樹枝盡折至世宗顯德元年河東

劉崇為州師所敗五代會要

世宗顯德元年春三月丙午有鵲巢於縣郭之南川高平志初

鵲巢于栢樹之顛鷓鴣鳥為害乃移巢于城郭南平地每巢中為糞者七八

宋太祖建隆三年春夏大旱州志

真宗大中祥符元年五龍躍於丹水時方大饑民艱於食有司禱雨不應至是

五龍見于丹河之上光映數里雨澤隨降歲豐稔斗米僅數十錢高平志 三年夏五月澤州

甘露降 四年春三月澤州甘露降省志 五年冬十月澤

州廳事梁上生白莖紫蓋芝二十四本五行志

神宗元豐八年秋澤州禾合穗或異畝同穎五行志

徽宗崇寧三年冬十月澤州芝草生 政和四年澤州槐

木連理五行志 宣和二年秋九月大陽成湯廟芝生於梁

六莖竝秀是後歲屢稔舊州志

孝宗淳熙十六年秋七月陽城隕霜殺稼幾盡省志

金熙宗天眷三年夏五月庚申澤州高平地地震驚死者數百人

皇統三年春三月戊子五龍復見于丹水 八月高

平嘉禾生

元世祖中統元年夏五月澤州饑五行志 八月癸亥澤州旱

民饑救賑之五行志 至元二十年六月沁河水涌溢壞民

田 二十七年澤州蝗省志 八月沁水溢五行志 二十九

年二月壬申澤州獻嘉禾元史

成宗大德七年秋八月朔丁亥澤州高平地地震時夜將半大風起須

輿地震如搖櫓狀官舍民廬壞者無算高平志 九月高平火 十一年夏四月

庚戌地震先是上都地震壞及宮寢至是高平地亦震自午及申凡三日乃止高平志

仁宗延祐三年陽城地震陽城志

順帝至正十八年二月乙亥冀寧陵川地震省志 二十二

年夏大旱三月盜起高平志 二十八年大饑州志

明洪武四年澤州麥秀雨岐知州李祥以獻省志 二十年陵

川嘉禾一莖二穗州志 二十五年澤州嘉禾異畝同穎

省志 永樂十二年夏大旱州志 秋八月朔甲子澤州高平霪雨

害稼高平志

景泰元年秋七月戊午澤州高平陽城隕霜殺穀州志

天順六年澤州高平歲大饑斗粟千錢民易子而食高平志

成化三年州虎白日噬人都御史李侃遣捕之州志 九年

澤州旱省志 十一年澤州大水州志 十八年高平西山有

澤州府志

卷之五十一 祥異 五

角而羊者鬪於金峯之麓才忽暴漲損傷田禾廬舍無算

高平志 二十年澤州高平陽城大饑民多疫死生者至相

食詔遣戶部郎中移河南山東二省粟各萬石賑卹仍免

山西闔省田租之半高平志 八年高平蝗省志 十一年澤

州大水河暴漲北城傾圮舊州志 十二年高平夏旱秋復

澇高平志

正德四年夏四月陽城雨雹如拳禾木盡毀人民饑陽城志

五年陽城雨雹省志 八年高平黑眚為災夜則嘯於梁

或坐於榻狀似青衣兒童見之輒懼死凡五晝夜始滅高平志

志 夏六月澤州陽城蝗 秋八月澤州無雲而震既而

大風雨平地水深丈餘漂沒民田四千頃省志 十二年夏

澤州陽城黑眚省志 十三年澤州陽城高平秋大水丹河

漲溢臨丹河村舍數千間多損壞高平志

嘉靖二年春澤州高平大風飛沙三日麥苗被壓死高平志

五年冬十月三日巳未澤州高平陽城地震百姓驚恐

相與抱持伏于野不敢入室高平志 七年七月澤州陽城

旱蝗饑省志又見陽城志 十一年春澤州高平雨雹州志 夏陽

城太旱七月乃雨歲大饑陽城志 冬十月澤州陽城星隕

如雨陽城志 十二年春三月癸丑高平雨雹省志 十五年

夏陽城雨雹盈尺麥盡傷民饑陽城志 十六年澤州蝗省志

十九年七月朔陽城日食晝晦星見省志 二十年夏六

月澤州大風傷稼舊州志 三十四年夏五月澤州陽城雨

黑子如蠶沙 冬十二月地大震有聲如雷月凡數震屋

壞垣崩人畜多壓死陽城志 三十五年夏六月陽城大水

秋澤州地震省志 三十六年夏六月澤州大水嘗稼壞

民居舊州志 三十七年夏四月高平羊頭山產靈芝入貢

舊州志 四十二年春三月澤州陽城天鼓鳴省志 四十五

年澤州黑眚見省志

隆慶二年陽城饑陽城志 秋七月陵川地裂二十餘丈寬

尺許陵川志 高平大有年斗米錢三十高平志 四年夏澤

州大水漂沒廬舍人多覆壓舊州志 六年夏六月十六日

酉時澤州西北天裂須臾而合越三日天鼓鳴又七日日

三環省志

萬曆二年秋八月辛巳高平獲玉兔一高平志 五年秋彗

星見于西方長數丈其形如帚經月餘不滅舊州志 八月

陽城螟省志 八年秋九月陽城螟傷禾豆省志 十年春二

月高平換馬鎮北山鳴三日裂數丈廣尺餘山裂時震動

數十里高平志 十一年春二月乙卯高平民吳守倉妻一

產三男高平志 十三年春三月高平自午至夜地大震者

三 夏五月雨雹如杵禾黍盡壞高平志 十四年澤之州

縣春不雨夏六月大旱民間老穉剥樹皮以食疫癘大興

死者枕藉闕三月詔發帑賑之省志又見高平志 十五年澤

州縣復大旱民大饑疫癘死亡如故舊州志 春三月陵川

地震陵川志 夏五月高平雨雹壞民廬舍高平志 十六年

春澤州地震大疫流行民戶有全家殞歿者舊州志 十八

年宣寧王府脊瓦上螭獸吐火尺許踰時方息省志 二十

一年秋九月高平唐安里煤窰雷震火光上騰高二尺餘

周圍廣百步火焰時下熱雨尋復入窰井人不敢近高平志

二十二年秋高平唐安鎮暴雨水溢壞民居高平志

十四年冬十二月高平獲玉兔舊州志 二十六年秋七

月高平陵川雨雹壞屋傷禾高平志 二十七年秋七月

高平雨雹八月隕霜歲大饑高平志 二十八年夏六月高

平雨雹如拳積盈尺不消麥熟盡壞舊州志 三十年夏五

月高平店頭村大水壞民田平地忽裂大穴水入其中已

復合如故高平志 三十二年秋七月高平唐安里河溢省志

三十三年冬十二月州城西煤窯火數年不滅州志 三

十四年秋九月陵川天鼓鳴陵川志 三十五年夏四月高

平隕星于東平邨墜地有聲 閏六月冷氣如冬長河有

霜高平志 三十七年秋大旱澤州陽城陵川禾焦死民大

饑州志 三十九年春二月陵川地震陵川志 四十二

年秋九月高平地地震聲如雷省志 四十五年夏陽城旱蝗

蝗頭翅盡赤翳日蔽天六月終始雨省志 秋九月高平彗

星見至冬十一月止高平志 四十六年高平秋九月雨雪

凜冽如冬冬十二月日暈耳高平志 四十七年秋陽城饑

陽城志 四十八年夏五月高平雨雹大如杵屋盡碎高平志

天啟四年夏陽城安陽里產雙頭牛陽城志 六年沁水

崇禎五年秋陽城雨兩月不止傷禾稼陽城志 六年沁水

猛虎食人省志 高平陽城沁水夏大疫冬無雪陽城志 冬

十月高平鷄鳩至體似雌雉鼠足無後趾岐尾不能樹棲

性躄急群飛飛集若蝟毛高平志 七年春無雨陽城饑人

相食陽城志 九年陽城野多狼食人不可勝紀陽城志 十

一年沁水蝗省志 十二年澤州豹入城省志 夏沁水旱蝗

冬蟄生纍纍然蔓延附地如鱗米貴民大困沁水志 冬陽

城木稼凝綴如玉陽城志 十三年春三月陽城天赤日月

無光者二日陽城志 夏無麥秋無禾是歲斗米千錢陽城

陵川沁水民多餓死人相食舊志 十五年六月夜陽城地

震有聲如雷陽城志 沁水縣治大門災沁水志

國朝順治二年陵川新鄭書院產紫芝二莖 沁水大有年

省志 三年秋七月高平大水省志 四年沁水大旱沁水志

陵川蝗飛蔽天食苗幾盡民多流凶

詔賑濟陵川志 五年春陽城蟄生不害稼陽城志 夏沁水河

溢南城垣壞沁水志 秋陵川霪雨殺稼山頭皆水陵川志

沁水霪雨月餘民間屋壁多頽損沁水志 六年春正月高

平大雷雨雪有星自西北墜於地光芒數丈高平志 二月

六日陵川地震陵川志 三月沁水大雪省志 夏四月高平

地裂州志 陽城地震陽城志 秋陵川又大水傷稼陵川志

七年七月二十七日陵川雨雹如鷄卵傷人殺稼歲大禱

陵川志 八年夏六月高平地地震省志 秋沁水大雨河水溢

傷禾稼沁水志 九年沁水大旱州志 十年夏五月沁水大

水省志 六月陵川旱荒歲歉收陵川志 十一年夏陵川旱秋

七月人民饑陵川志 十二年夏四月陽城天鼓鳴省志 陵

川夏大旱歲大饑斗米錢千五百陵川志 十三年高平沁

水大旱無麥人民饑沁水地震陵川嘉禾生省志 十四年

春二月陽城大風拔木黃霾蔽天簷瓦皆落陽城志 夏沁

水旱省志 秋九月陵川嘉木雙穗省志 十五年潞澤營兵

王士秋妻一產三男 沁水大有年省志 十六年春陽城

耕牛瘟陽城志

康熙二年春正月澤州天鼓鳴省志 七年夏六月十七日

陵川地震省志 八年陵川鳳山道院生紫芝省志 十二年

夏六月十六日陵川雨雹陵川志 十三年陵川地震省志

十五年春二月澤州大風拔木屋瓦飛州志 十七年秋七

月澤州見大星隨五色雲隕有頃白氣上騰州志 二十五

年夏六月六日戊午澤州大陽鎮天鼓鳴有大星隕明燭

數里占者謂天堡星也光照處主大豐是年秋果大稔州志

二十七年六月澤州大水省志 二十九年澤州沁水有

黑蟲食禾結繭繭大小各異形州志 沁水牛大瘟沁水志

三十年夏五月澤州沁水旱無麥六月蝗食苗七月稼蔓

生入人家與民爭熟食人民死徙者半奉

詔免租發粟賑濟州志 三十一年澤州沁水元日大風春不

雨疫大作死者甚衆州志 三十四年夏四月六月澤州高

平陽城陵川沁水地震與太原平汾潞屬同日地震 旬日凡數次城堞

屋宇多傾壞奉

旨發帑散賑又給貧民脩葺銀每間一兩并發西安庫帑脩

築城垣官廨學舍省志 三十六年三月沁水大雷電縣南

山塔頂寶瓶墜墻壁都毀沁水志 四十一年澤州病疫喉

腫即死州志 四十四年澤州大稔省志 四十七年澤州旱

省志

雍正三年十二月陽城民張國澤妻劉氏一產三男省志

四年澤州大有年省志 五年三月陽城民李珍妻宋氏一

產三男八月澤州大有年省志 七年歲大稔是年八月以

連歲豐登

特詔免庚戌年通省地丁四十萬以示勸勵冬十有一月

又以民人踴躍急公辦駝鞍屐不勞而集

詔免通省辛亥年地丁銀二十四萬省志八年歲大熟省志

九年十年十一年澤州麥有秋夏六月雨澤稍未敷巡

撫石率屬虔禱九府十州皆獲霑足秋禾大豐瑞穀盈野

省志十二年歲復大稔十三年五風十雨禾麥果蔬皆

遂長

田補晉武帝泰始七年六月大雨霖河洛伊沁皆溢殺二百餘

人

元魏明元帝永興四年九月建興郡獻白鹿

宣武帝景明元年六月丁亥建興郡實霜殺草正始元

年十月建興郡獻白鳩

東魏天平三年秋八月建州隕霜大饑四年二月高歡以霜

旱人饑流散請所在開倉賑給

唐文宗開成二年澤潞等州並奏蝗害稼

宋太祖開寶二年澤博等州水害秋苗

徽宗崇寧五年澤州槐木連理大觀四年澤州槐木連

理

元順帝至元三年八月辛巳大霖逮日至癸巳不止沁河水

溢没人畜廬舍甚衆至正二十九年二月庚午澤州獻

嘉禾

卷之五十終

海少所記



